

瓿

甄

洞

續

稿

甌甌洞續藁文部卷之七

武昌 吳國倫 著

渝州

馮攀龍

校刊

序文十一首

邵伯如先生制義序

邵伯如先生蓋自諸生以文學名吳吳故言游之鄉
多文學士然未有不避舍先生者顧先生已酉一第
以往凡四上公車不得奉 詔對年且過五十始屈
首受邑學博士之吳興教授生徒非其志也無何鬱
鬱捐館舍矣諸海內知先生者莫不扼腕先生豐於

才而畜於遇又莖莖以中壽客死天道之謂何乃先生生平所爲制義則自身後益傳予暇日常從市肆購得數十首讀之快然惟恐其盡因稍稍僭爲批評授諸兒及諸門人矜式之曰此閑於制而不束於制者也卽取弘正間程式與王陸唐瞿諸先輩之文並案而評騭之無所置甲乙焉蓋先輩學務博綜辭根理要勁風骨而不露美色澤而不穠運變化而不譎今文由古文也晚近承學競自伐其根素而欲以畫脂鏤冰之技當之鮮不醜焉自失矣諸子聞予言而三歎之久之間有 詔厲天下文學官釐正文體禁

一切剽剝鉤棘語不錄而獨采先輩之文播爲士型
範於是在後進生始復慕先生而購其遺文恨不
可多得會先生之仲子麟武以進士來理我武昌而
予首以先生遺文來請又得數十首出以示人則人
人爭手錄之予曰管城疾病矣因命吾兒校而付剞
劂氏以廣其傳嗟乎先生之爲斯文也不得身用之
而以子用不得親見其僨也而以四方後學傳其猶
軒后之珠重淵不能匿卞和之璧嶠石不能藏乎夫
天下之至寶其精光固自有時而發而一時顯晦亡
論矣

賀隨州祝使君被薦序

夫薦舉之典關世道民生豈其微哉存昔帝王之廷
咨岳讓能籲俊尊帝上下交相敬戒師師濟濟之風
至今猶想見焉漢興察舉郡國文學高第及長吏守
丞行能異等以次補右秩或下璽書褒厲增秩賜金
或卽選諸所表召拜公卿太傅以故史稱漢世多良
吏由察舉慎也今世察舉與漢制小異蓋漢薦吏無
專官自三輔太常以及列侯中二千石皆得各舉所
知以備雜問其猶有立賢無方之遺意乎今天下長
吏守丞治行惟按部御史得察舉之乃其所察寄耳

目於方岳監司采風謠於耆老萌隸必方岳監司耆
老萌隸皆曰可而後舉雖善宦者不能挾詐僞以奸
其權是亦漢遺意也然予又聞尸子有言舉士不論
才則伊尹管仲不爲用張敞與朱邑書亦謂故事各
達其時之英俊若必伊尹呂望而後薦之則此人不
因足下而進矣夫舉必當才舉吏者之職也至負才
以希舉豈所謂名實純美者乎頃御史柯公按楚薦
列楚吏而以隨州祝君爲稱首大旨謂祝君文學吏
事可當漢循良卽異時召拜公卿太傅無忝也一時
朝士大夫輿隨諸父老子弟莫不竦意爲祝君賀其

僚佐陳君汝岳君世祐則走使下雉索予贈之言似
謂予知祝君也遂不敢以耄辭祝君故汝南太守子
隅公子也又少年負奇取明經甲科最高等其領隨
則以隨爲漢東大國非祝君弗任也比入郡遂能折
節問民疾苦循循遵撫式不自用其才亦不擅爲條
教第宣布詔令通達幽隱期與民休養而已大者釐
正田賦使游民不得浮食閭里詭譎繇役次卽慎守
藏便宣輸納而宿豪大猾不得因緣爲奸屬其境西
連荆汝東拒邾鄆大盜時時竊發爲長老憂祝君坐
策要害嚴游徼申約束使閭里自相守望以待之未

幾紋縛小偷格殺巨寇數十輩境內晏然稱平比歲
荐饑視君憂形於色尋捐俸設糜聚饑人而輔之已
乃請發帑金千金易粟賑之所全活不下萬衆訟庭
多暇輒進博士諸生與之評文辨疑義而旁郡諸生
亦多聞風而鼓篋至者蓋視祝君馬南郡矣君又好
爲古文辭每一篇出客珍傳之雅爲李太史本寧所
稱賞頃復刪定故隨州刺史劉長卿詩序而剖剗之
以廣其傳嚮意雅道可知已夫祝君以經術潤飾吏
事章章乎名實相應類此部使之薦豈其浮譽哉故
曰形非爲影也而影從之呼非爲響也而響和之君

子功先成而名隨之卽祝君一日而名滿中外雖欲
自掩其功不可得乃部使則知己之遇耳且虞丘之
薦孫叔敖爲楚非爲敖也公孫枝之薦百里奚爲秦
非爲奚也魏子之薦賈辛爲王室非爲辛也知薦者
之所爲則知被薦者之無所爲惟無所爲則奉職循
理其志不渝破觥斲雕其趨不易世道民生且嘉賴
之非獨能其官取公卿太傅而已祝君其懷永圖哉
君字耳剡浙西海寧人

王行甫集序

王氏楚世家行甫蓋稚欽先生從子也稚卿在德靖

間以詞才擅名史館海內士爭誦說之近體庵有四
傑古詩凌厲三曹而文則刻畫左氏內外傳楚諸先
輩鮮有能方駕者行甫乃自束髮抗志欲修其業以
故不矜門第不席父兄之資而獨厲首誦先秦兩漢
書攻爲古文辭以自見而見者類以爲囁嚅惟所與
一二詞客膾炙之比予有大梁之役過齊安行甫儼
然曳逢衣叩予談稅言言中窾予亦心許之此其志
不稚歟不已也越二年予歸自大梁行甫業已鼓篋
遊太學著名公卿間顧益不自有也歲時涉江叩予
山中把酒相倡和者十餘年又嘗偕予西陟天柱東

泛震澤所過名山大川所遇文人墨士無不縱覽交
權長言高詠而雅道爲益廣歸而削其舊草過半而
獨存其精者錄以示予予益大喜謂使稚欽而在何
以加子行甫猶逡巡讓讓伯父何可當也已又築蒼
蒼閣舍旁日謝客坐所其上襟衽江漢諷詠古今咀
萬彙之菁華搜五方之逸典已乃收視反聽瑩精研
思肆爲樂府歌行以及諸序志記傳弘博雅麗浸淫
漢魏元貞諸名家於是又自削其舊所謂精者過半
合諸新製爲若干卷示予予讀之林林總總蓋不勝
其嗟異焉不圖爲文之至於斯也稚欽豈獨無所加

子哉行甫始稍稍自信曰庶幾無忝我伯父萬分一
拜子之賜也子曷難一言序之予聞古之言曰言以
足志又曰學以益才夫言之不可以已也志先之才
之不可以已也學先之是故舍志以立言其言不文
舍學而用才其才易置以是而望作者之庭不亦難
乎茲無暇遠引卽吾楚多先民自鬻子以逮屈左徒
作者凡數家或幽綜造化明覽神理或習於遺訓而
富於典墳或著離騷楚風雅以爲詞賦祖卽傳之數
千載以下誦其言而志可知已論其才而學可知已
夫稚欽修先民之業以爲後進師行甫又脩稚欽之

甌甌洞續稿

卷之七

六

相

業以自傳在古匪志定而學足能乎雖然有神解焉而志與學不盡也語云用規矩準繩者亦有規矩準繩夫非輪扁斲不及言匠石所不可試者乎且夫琴不鳴而二十五絃各以其聲應軸不運而三十輻各以其力旋故曰便有聲者乃無聲者也能致千里者乃不動者也今之談阮者鮮究斯極何以知行甫或予自童年聞維欽之風今老矣又得藉行甫爲所以不朽茲不憚爲述家云

姚氏從本錄序

太僕姚公思載

蓋自嘉靖庚戌同予舉進士交三叔深

越二十四年嘉慶癸酉予適奉 命視黔中學而公
二子伯允迪仲允升並試諸生高等相繼舉明經科
一時黔中以家學顯名姬氏爲獨盛矣予旣別公十
餘年且屏處巖下聞仲子業已剖符爲滇之路南守
茂有行能顧引望六千餘里不通間問歲時念之會
路南遣使併奉太僕公書來見存予楚然喜曰故人
高義哉乃又以從本錄屬之爲作序按錄姬氏其先
舒城人自樞密公真爲舒守禦遇我 高皇起淮右
首率所部應之授神武衛鎮撫直故長子謙繼其官
擢濟州衛指揮調宣府右衛謙弟曰誠與誼並占籍

濟州久之誼起行間歷陞濟州衛指揮使調西安右衛誠子昱寔與有勞焉及誼故子景尚在襁褓昱得以從子借襲後景長還襲之已調貴州普安衛昱與俱往尋病卒景適調征松潘夷上首功勅晉都指揮僉事景故無嗣而昱子信信子鑑並以家難空乏因循踰期遂爲文法所格不得襲而鑑獨筑筑依新添衛守祖塚家焉居數歲鑑奉詔輸粟授冠帶舍人尋累軍功實授右所百戶遠鑑子瑄赴襲則又束在軍正條坐越級降爲小旗蓋姚氏汗馬之勞樹自開國傳襲累朝凡再格而報罷茲太僕公所爲鞅

孰不能平也。自太僕公起家稍爲先世昭雪兩臺使
從閫帥臬大夫議僅得以舍人附衛稱官籍云昔者
晉舊臣之族降在皂隸者叔向閔焉謂非所以勸有
功也。漢功臣苗裔或絕或乏班固表之殆亦有深意
況太僕公身爲勲舊子孫而能默默坐視其澤斬焉
已乎至錄其事而以從本名則仁人孝子之心也其
爲太僕公子孫者抑又可思已夫物本乎天人本乎
祖均之一本也孔子曰永生穗向根不忘本也。范文
子亦曰言稱先職不背本也。卽左氏所紀於國曰先
人之敝邑。杜居曰先人之敝廬。杜寶玉曰先王之敝

器春秋並予之其亦以仁孝爲訓乎予竊以爲妣初
以戎事興至太僕公父子卒用儒術通顯文武迭勝
屈信相倚伏天之贊妣也於是不可度矣

王奉常集序

王敬美氏蓋予師大司馬民悅公仲子予友大司寇
元美公愛弟也往予二三兄弟偕元美稱詩京師時
敬美方弱冠美手儀而刺經綴文已嶽嶽負奇氣乃
又承世德而師友其父兄遂成名儒會登第以後迫
家難與元美舍皇棄官伏逆旅人奉司馬公棗廬蓋
不勝其積懣拂鬱朋有所激而爲詩詩輒高品元美

大驚異之適予待調入京間行過逆旅人慰以二詩
雅爲所稱賞旋與予詣請室視司馬公敬美因口誦
予詩一時父子師徒相顧黯然飲泣而別久之敬美
多所誦習考鏡而脩古文辭漸工李于鱗見以爲大
奇呼小美而才之吳中人稱王氏二美矣於是敬美
益自喜而日買勇於作者其志不奄有古人凌駕一
世不已蓋自難後里居侍太夫人養垂十年起家爲
儀部郎累遷至太常少卿中又歷十餘年而居喪請
疾之日半之頃自太常請疾歸遂不起海內士由一
藝以上無不欷歔悼惜爭爲詩誄哭之元美書來謂

天喪吾弟吾無樂乎有生矣傷哉踰歲元美詮次其遺藁合古近體詩及序志傳記贊頌諸文得五十餘卷錄而傳之走使遡大江入楚屬予序而其子太學生士駟輦又申之曰此先君子治命也嗟乎敬美故兄事予而晚年知予尤深顧愧予才不逮敬美遠耳今手其遺藁讀之累日夜不能掩卷庶幾其人儼然存乎蓋敬美其才無人而尤所精於風雅典謨暨先秦兩漢魏晉諸書旁及二氏百家音官釋史之屬無所不窺且備嘗諸艱心志荼苦以故聞識廣而神氣益完思慮深而天機益斂意興高而風韻益鬯之其

境之所會而極其情之所通無不應手立就蓋有巧
若承鯛弄丸勁若飛戈奮戟麗若繩珠編貝捷若駕
風鞭霆廓宏若張千門立萬戶詭異若飛兔越山神
魚超海千態萬狀使人應接不遑而叩之則有餘音
按之則有微旨也予竊擬其性情發於詩而風世之
道寓焉論議持於文而經世之道載焉此何並立言
士卽吾黨諸兄弟當之鮮有不自失者斯真元美第
哉乃元美雖善張其第而不爲侈語詩多其涵詠漢
魏晉宋而謂不從門入以神詣之境勝文則出入西
京韓歐諸大家間采世說自以爲得其三昧嗟乎知

第莫若兄矣夫行空之馬不受銜檠燭地之蠶不假
營繸謂世之所不常有也才如敬美豈世之所常有
而可區區臆論哉別著有澹思子望崖內外編經子
臆解閩部疏三槌圖說窺天外乘二酉委談學圃雜
疏諸書業已行世至其生平德誼中外行能則相國
元馭公志之不具述

觀一軒藁序

蓋在嘉靖己酉予與觀一陳君同舉於鄉君故精擅
經術旁及史漢外家言暇日好爲詩歌以自適久之
累待公車不得詔授文學官司教吳興之孝豐稍

遷淳安縣令所至藉有令名顧其受性樸直不善宦
卒與時枿鑿飄然拂衣去非止厭束帶耻折腰已也
里居垂二十年掩關抱書課農訓子不復知有世味
而獨詩歌之好日癖篇章之投簾笥者日充其子茂
才雲奎輩東而錄之得若干卷成書請於君題之曰
觀一軒藁因走使甌甌洞屬予序予倚牘而嗟異焉
君與予交四十餘年地相望僅三百餘里又皆同有
此好乃生平未嘗介一字相贈答而於垂老之日始
得握故人全稿讀之亦自意外奇事夫陳君出處類
陶元亮而所爲詩歌亦徃徃似之稿中諸體畧備率

多任天質而輸寫其胸臆當境與情會言言境也亦言言情也故不資型範而自合不假津筏而自超不涉蹊徑而自為一家庶幾陶然澹然有如其人矣夫詩言志陳君志在自適故亦取適而止焉漢楊雄作甘泉賦成夢陞五臟出而卒自謂雕蟲小技壯夫不為豈無旨乎言之哉蓋巧遲不如速拙卽作者亦忌過役其神而巧斲其性予故謂取適而止者似元亮也鴻烈之言曰好武非俠也好馬非騶也好味非庖也從其所好而達於其所不必好可與語陳君之自適哉

方山人詩序

山人鄆人也貧而嗜詩詩輒工鄆山人之爲詩者無
慮數十家而獨不知有山人山人亦私謂鄆山人多
自以詩行其俠亡奇徙而游楚楚人王行甫識之遂
與之結社講業因時時過予言詩一有所觸而悟輒
大稱快鼓掌起引巨觥自浮曰史遷賁離騷楚風雅
楚蓋有其遺音焉吾舍楚何適已益抗志希古博習
好問雖僦居窮巷被褐羹藜手一卷不釋興至則長
歌微吟惟其意之所如予嘗避暑樓下而山人讀書
樓上每聞其吾伊聲累晝夜不絕叩之則屈宋而下

以及揚馬班左諸賦無不成誦予益心異之山人又自謂士遇知己難耳貧何病於是攜其家來與予割舍而居分粒而食者十年而詩益奇進名藉藉江漢間余友曾司空三甫陳京兆王叔李太史本寧郭太史美命鄧給舍震卿費給舍國聘周督學啓明朱懷慶子得丘潮州譙之與穆章諸王孫無不折節山人而與之言詩者後楚饑山人始別予移家秣陵予偶江行遇其從兄定之司徒舉手謝予曰家第仲美詩一變遂可爲布衣嚆矢微予其孰能嚆括之未幾山人自裛其詩若干卷成書從秣陵遣其子用譙來問

序予惟山人身處世外性甘貧如飴故能澹泊勤苦
自趨於雅道今觀諸體錯列種種得之應心其致深
其韻遠意氣豪而不恣色澤妍而不靡擬古而不涉
蹊徑詠事而不落塵滓山人深於詩矣茲伯牙所爲
見志匠石所爲取質山人蓋助予多也予何補於山
人哉第其初與行甫同社而詩卒與行甫並傳予竊
不忝爲知己耳客有曰山人遊道廣奈何輕去父母
之國客遊二十年忘歸豈其家於詩乎予解之曰此
從所好耳彼鴟夷子皮非生於陶庚桑楚亦非畏壘
產也所至卽爲安土而人尸之豈必執重遷而譏東

西南北人不近情乎夫鯤徙而鵬則搏扶搖蛇蛻而龍則乘雲霧士固貴善變耳客又曰詩者持也持人情性不使縱也乃山人徃徃善使酒卽酒人畏之奈何不自持乎予咲而解之曰山人持於詩而不持於酒茲所以稱山人客惡知之客輟然曰今知山人矣

奉祝罷大夫張公五十壽序

公凡三仕楚所至有惠政而官屬士民並戴之然獨於我武居最久自州牧以及郡大夫歷十餘年累被薦書凡兩報政再拜 恩澤詔卽長老未之前聞以故州人與兩邑人親愛公不異所生父母而公亦予

視州邑人所爲乳煦捍衛計不遺餘力遇州邑長佐
之新至者輒不靳舉舊政告之有一善若自己出口
津津爲之游揚有一不盡善則又陰訾而曲論之使
無有失墜乃已茲庶幾開誠布公之心哉官屬藉公
自樹士民亦藉公自安無不舉手稱天幸而稱戴又
視旁邑倍矣歲三月庚申爲公誕辰寔始行年五十
人人望見公美髯豐頰頭無二毛不知其艾也逮公
巡行下邑所過父老遮道擁輿相勞問願公千歲諸
搢紳儒衣冠則猶稽老更惇史而采閭巷頌聲合而
書之爭先爲公壽此何以感焉語有之羣嘯而風羣

吁而雨聲應氣求非可強而致矣適大治令郭君達
將命爵祝公先期謁不佞爲修辭調不佞知公也夫
父老祝公矣搢紳儒衣冠祝公矣豈部吏之祝能復
有所更端而異其撰乎竊以爲祝在父老則麥丘之
遺風也祝在部吏與搢紳大夫儒衣冠則闕宮之遺
響也殆異辭而一言微公其誰當之或曰古者五十
不稱老不稱老而祝之何居在禮男教有之男子由
幼弱而強壯皆乘時有所服習至五十而神氣始定
今觀公氣腴而神益王人不知其艾也夫艾也豈非
耆順耄耄之徵乎一宜祝又古者五十始命爲大夫

為其閱歷多而於國家事要民情鮮所不習用之
在事則輕車就熟路迎刃無全牛與初仕服官政者
不同年而語也乃公則自強年受命稱大大每試
盤錯輒有成勞此殆天授異才不待閱歷而綽綽有
餘裕者而猶夙夜儆恪惟恐上負知遇下失吏民心
不自知其大夫也夫大夫也非九列三公之階乎二
宜祝又五十慕父母者稱大孝知天命者稱時中知
四十九年之非者稱君子今觀公言必稱先德而侍
毋養極懼亦可謂思考奉職循理而耻於阿附以自
媒亦可謂侯時每一令且下一獄且成微有不當於

衷曾不俟終日更張之亦可謂知非庶幾衛君子之
流亞而虞孔之徒也三宜祝夫宜祝斯祝之矣何待
三彼所謂不稱老者鄉尚讓也非是之謂也郭君聞
予言大喜再拜謝曰達不敏謹奉先生名言三祝公
豈惟公壽卽武昌所部諸州邑皆公壽域矣

程氏考旋集序

是集具程辰州累行甚都而三子者奉以爲景鐘彝
鼎不啻也命之曰考旋何在易履之上九視履考祥
其旋元吉夫履上之終也旋履之完也元吉履之大
善而有慶也辰州公考焉集所由名不誣矣豈亦晉

劉毅所謂闔棺之論乎今公卽世已十餘年集之傳
垂十年而傳又多自鉅公鴻筆林林總總類皆華袞
其文而金石其聲公蓋可以不朽矣乃其仲子洎未
已也介使數千里問序於余余撫卷而嗟曰汝揚余
故人也初予與其從兄弟汝濂汝正爲布衣交暨公
計偕遇予京邸儼然以二從書見投遂爲莫逆已公
登第爲戶曹郎相與過從數歲驩甚每與之飲若赴
大敵雖賈勇奮臂不能當比諸客頽唐散且盡公猶
軒軒然引滿自觴竟一席身無情容口無譁語燕市
酒人無不屈首咋舌下公者余旣習公長者恂恂多

質行徐察其主計則握算有餘智肩事有餘勇諸曹
郎並推讓以爲不及未幾予以譴謫公亦以宅憂歸
一別如雨兩相望如參辰久之猶從鄉人聞辰州循
良聲尋以待調自罷堅卧不出海內士人爭高之乃
不知其望耆而倍也悲夫悲夫今觀辰州年表與諸
狀志傳誅頌贊之屬益知公天都異產而居身大節
經世鉅猷膾炙諸君子之口未可以縷覩盡而吳安
人又以清德遠覽秉家政佐之固宜其仕爲良牧處
焉高士歿爲明神所在社而稷之亡忝也及讀公所
目著中星圖說忠孝經註典禮治安八議則自掩卷

竊歎公學通三才明習當世務其漢董賈之流亞與
且善自韜匿不欲有著述名若曰身隱矣焉用文之
茲公之所以爲文也故劍期於斷決不必龍淵莫邪
琴期於宣理不必鳴廉號鐘學期於有用不必三公
四嶽大夫也以其有用者小用於一世又以其不盡
用者大用於來世則著述之遺也穆叔之稱不朽公
其庶幾哉予故不論其世而槩其大者如此

大隱山人稿序

大隱山人者荊國樊山王自號也王字昇甫食邑斬
少負異質抗志慕古日以讀書爲娛每晝分而食夜

分而寢不知倦諸左右內豎竊病之諷曰夥王之爲
沈沈者身嬰衮冕珪組而處殿屋帷帳歲奉千鍾日
御五鼎所不足者非富貴也奈何不自喜而營營博
士業爲山人咲而不應蓋賈勇於學折節親師友尋
築大隱園邸旁以待四方名公卿大夫與布衣之豪
至卽倒屣擁篲迎之曰治供具爲高會與之陳說稅
文倡和爲詩歌各罄其驩乃已蓋山人旣不自有其
王客有起而爲王壽者輒引滿浮之曰子縱憐而王
我王何以加於山人哉自是山人名益著而所爲詩
歌世益珍傳之會詔下宗正條遞減王祿而大隱

園客則猶此相錯也山人於是坐困不自給至鬻
舍質子錢厪厪爲朝暮計已又上書請自試不報乃
奏記荆王謝朝請以家乘授伯子而自釋冠野服脩
然屏處半畝之宮蒔蔬種藥甘貧如飴間與一二方
外士談養生家出世之旨將老焉屬其三子賢而能
文哀山人諸藁得十七卷因介劉生九齡來謁序蓋
劉生予門人而山人倩也予卽不文嘗爲大隱園客
敢不拜命乃窮旬日之力卒業諸藁不獨具體作者
而音節鏗然人耳色澤瑩然人目爲其學足以廣才
而不爲才縱情足以赴法而不爲法束詩賦在曹魏

李唐間而文駸駸四大家矣夫弓待檄而後調劍待
砥而後利玉堅而鑲之成文則礚諸之功也木直而
揉之成輪則礚指之力也彼言棄學而循性何以異
於舍舟而履水哉山人自少慕古至老不衰其取諸
檄砥礚揉之益非一日矣卽世世珍傳之奚疑乎所
交諸宗大梁淮甫豫章用晦宗良貞吉最久而南陽
孔炎子厚亦時時以竿牘相求晚年乃得與山人父
子稍親而一時經術辭才並是以發五潢之精烈而
稱聖世佳公子顧獨山人有大致焉在不自王而善
用隱也是又能以不文文也文其在茲乎鴻烈之言

曰歌采菱陽阿而使鄙人聽之曾不若延路陽蜀非
歌者拙也聽者異也予卽不善聽山人業以爲知音
矣謹序

多雲館藁序

多雲山在羅田竟嶄然起中天爲衆山冠邑人蕭舍
譽愛之因以名其館云蓋舍譽旣舉明經十七年年
尚壯而所著古文辭業已具諸體成一家言富矣顧
猶有深意不欲示人以朴乃越數百里涉江就予取
質焉予得縱覽諸稿而竊歎之茲良工哉何運斤之
捷而心手輒相應也人亦有言循繩而斲則不過樹

表而望則不惑含譽豈遵是道乎以含譽才美而猶
濟六藝之源風四詩之旨咀萬彙之華漱群籍之潤
浩浩乎彬彬乎若臨武庫而鋒不可勝選陟鄧林而
材不可勝掄予且目駭心憚之矣何以質爲第從酒
間取其才不受約而氣不就馭者一二評騰之含譽
輒大喜避席起酌大斗爲予壽又自引滿盡數斗如
是散髮飲者數日不復問一字別去別半歲使使銜
其藁來請序則已削其初者半而精其初者半得卷
十五成帙六予日手一帙且讀且快惟恐盡茲不選
鋒之最銳掄材之最鉅乎含譽可謂勇矣夫今之談

稅者非縉紳大夫則布衣士搢紳以退食布衣以游
閒皆得肆餘力爲之而猶多所不盡合乃舍譽介其
間進不得自媒退不得自佚終歲守公車業以待詔
對不圖所就一至於斯也非負簞才能乎夫以經生
譚執鑿鑿中窾如是者世不多槩見頃予覽詩數得
東越一人胡元瑞而吾舍譽毅然起而角之亦足以
張楚史氏以秦壯齊曰東西秦今雖謂兩生東西楚
不亦可乎又舍譽爲稚欽太史鄉後進且嘗游元美
大司寇之門兩先生名世作者舍譽蓋有所受之也
故曰鼓舞者非素縱不熙者非眇勁漸靡使然耳何

有於予予聞師曠之調鐘也以後世之有知音者也
予誠非曠而含譽無負於知音矣友人王行甫又爲
予言羅俗近古士人多愛客而蕭氏世孝謹有萬石
君家風至今譽好行仁義修乃祖乃父業而益振之
頃屬歲儉不靳割家庾銷饑者而藁裡其孝者樹德
甚衆邑人人誦之嗟乎含譽豈獨詞人也與哉

龍龕洞續藁文部卷之八

武昌 吳國倫 著

渝州 馬攀龍 校

序文九首

賀大冶郭令君考績 加恩序

往予在中州遇郭君而知其擅經術負用世才既別
十餘年君累舉進士不第始謁選得大冶令每過予
道故猶怏怏不自得顧其治行則已藉藉輿誦余竊
心喜之比及三年當報政 闕下屬歲不登而民易
動兩臺使難其行而獨表異其功能書最以 上上

嘉之賜璽書褒異君因爵君父爲文林郎母若妻並
孺人一日而令君名動 朝著 恩光照耀梁楚間
至榮矣 璽書且至今君冕衣裳郊迎如禮而邑老
吏士大夫莫不喜動顏色謂邑百年以來所未有此
不獨令君榮卽邑且藉令君重而後來者皆有所豔
慕而視君爲吏師邑人自此有嘉賴矣其佐陶子鄭
子與其幕陳子將飾筐篚以賀君固辭曰達不習爲
吏徒以二三子夾持之力苟免於墜失又不自意徼
福兩臺使而冒 天子寵靈日鯁鯁焉懼不勝也敢
復拜子之賜無已其乞吳先生一言乎於是三子造

余以告余曰令君余故人也茲受命不受賀其賢乎夫吏治自古難矣而治於今尤難而治大治則又難漢世稱得人之盛列在循吏可指而數焉漢以下抑又可知已難也今去漢已遠文益密賦益繁令握百里符自郡大夫以上兩臺使以下皆得討其行事而董正之曾不敢自用恩以紓其衆尤難也大治又楚僻邑其地磽确而物力微其民勤苦織嗇不足以自給加之饑饉益蒿焉不樂有生乃責逋之檄日衆衆下令將能覆釜而糜耶且猾家少年類多操刀筆侍上官往往有所憑以干令一不應輒持令長短而

輕重之令稍不自樹則首鼠而依違其間鮮不爲所
中以視它邑不難之又難乎郭君領邑客有難之者
輒毅然曰客嘗我乎邑豈有裔民也請奉 天子之
德意以蘇其無告者奉約法以平其無情者何難焉
且邑何嘗負吏吏自負邑見以爲難耳至欲斲法以
便諸少年則何異削足以就履刻首而就冠乎邑人
聞其言業已竦意俟之比至則崇禮教簡科條公聽
斷杜請託問遺節財省供庀善良而抑豪右徵歛以
時緩急率多襁至而輜輳者已乃餉存饑之羸過方
張之孽曾不遺餘力故一年民憚三年民安諸少年

一無所問而卒亦無長短可持茲令君所爲善自樹
而功能表於臺使 恩禮錫自 朝廷要之名實副
也夫居前不能令人輕居後不能令人軒古人耻之
矣故器以錯錯別利鈍馬以馳驟辨駑良今大治不
足以難君而君且以大治自見邑何嘗負吏吏自負
邑名言哉且天下惟愛民之吏能得君亦惟得君之
臣能顯親此國家治平之通理而守令公卿之大都
也人亦有言山致其高而雲興焉水致其深而蛟龍
生焉君子致其道而福祿歸焉文林公孺人並以閭
里之節受知 天子則以令君故釋裘褐而被華袞

俾歿者崇五鼎之祀存者正六珈之儀一官而二世
享之而猶世世珍之福祿大矣卽君用世之業當自
茲益廣其尚思所圖報哉予又謂君密人也漢享茂
爲密令視民如子後遷京部去密老少皆涕泣送之
君得無聞茂之風而以其治密者治大治乎卽旦暮
且遷予意大治人必亦知所用情君勉矣三子曰善
以吾明府拜先生之言庶幾彰君賜揚世德不朽
而奚以筐篚爲

大隱樓集序

是集蓋嘉魚太保方公詩也公故有十二卷傳於世

而沔陽陳述齡序之暨公謝大司馬縣車里門築大
隱樓養痾其上數年著述滋富乃屬其門人合編爲
若干卷手授予校之因得窮數月之力卒業諸體且
諷且歎美哉洋洋乎唐音也夫詩自風雅變而爲雜
騷而漢魏六朝則又以代變至於唐一振幾掩六朝
而上之今之談稅者謂七國裂周而兆漢六朝閏漢
而開唐予竊不知其解漢以前亡論六朝惟嵇阮陶
謝近古以下琢句雕章非不工且麗按之則色澤愈
豔風氣愈瀟靡靡去漢遠矣何言閏唐人政厭其靡
靡起而振之爲能家樹幟而人建鼓一變而爲正始

大家卽有所自開非六朝也故近世海內名公欲追風雅之遺反漢魏之樸而不可得類多布戾於貞觀持滿於開元大曆然猶未必一一破的難矣諸憑軾之士望嬰相之圃董董能挽弓輒宣言詩不漢魏而唐猶之舍穿雕貫蠶之技而爲人負轡矢亡豪也將誰欺乎若太保公之爲唐音則尤有倍難於唐人者蓋唐制以詩取士故詩不工不士童而習之有專力焉今則經術世務先之制益備進取益嚴未有緩其所先資而攻其所不急者公未冠舉進士而詩已著名此不有天授能乎其後爲令爲郎爲郡守爲藩臬

大夫治餉治兵歷三十餘年躋而後起者再最後遇
上簡知由邊鎮督府荐陟大司馬轍迹幾遍天下所
至題詠紀述具載集中其才情美其音節調其氣豪
宕不羈其風度廓宏高遠而一無所闕塞真有吞雲
夢吐衡和鞭風霆而上下霄漢者是旣林之大觀也
乃其微又不易測躋不加歟起不加盈謗書入而無
愧心薦書入而無德色威震華夷不言勇權無將相
不言貴此古大臣之度每於其詩槩見之公庶幾周
公之流亞歟而唐人又瞠乎其後矣人亦有言詩無
楚風楚無風也江漢汝墳列在二南非楚風乎卽大

史以經名騷詩且在楚公與子皆楚人託交垂四十年而年皆垂七十老於詩矣顧子才不逮公公反推轂之而以盡望之斤審音之耳見任嗟乎是豈予所任哉顧獨謂詩任楚則楚人之爲詩猶之粵夫人而轉也燕夫人而函也秦夫人而廬也庶幾有居業哉卽公純乎唐音則自祖離騷而族漢魏始謂唐音楚音奚啻焉語云豹裘而雜不如狐裘之粹知乎此而後可與公言詩

龍章錄序

龍章尊君命也曷稱龍焉君乾道也乾爲龍聖人

龍飛在天故其德爲龍德章爲龍章尊之亦神之地
尊之示不可褻神之示不可常也夫制命在君非常
數被命在臣亦非常遇故書勞勸能則予不愛爵感
恩報禮則仕不愛忠由一命以至九命由受職以至
圭瓚秬鬯皆龍德之施而神道之教也豈臣子所得
私覬而槩膺之者哉我國家綜核吏治恩禮臣工
布在令甲有差等而不以中外得之者稱天幸不得
亦不敢有缺望自予所聞睹累朝先輩嘗有位至六
卿未及沾一命貤封其親者則所謂遇而不遇非常
遇也何論外臣哉頃郭君爲大治三年報政太宰太

宰列其行能高第上之 天子天子嘉悅之命司勳
議封太史撰制制曰大冶令達廉平子惠祗厥官其
賜階文林郎而追贈其父朝陽如達秩母吳妻姚並
受孺人封夫郭君以治行受知 王上異矣而父以
耆德毋妻以淑德並載 褒書自天而下儼然覲
天顏聆 天語有不勝其欣異而竦懼者兩世徼福
一國稱榮茲不異之尤異乎郭君奉而珍之爰有斯
錄意遠矣意遠矣大者志 主上之恩而思報思報
則君爾忘身身益顯國爾忘家家益振且爲先人表
義方爲後昆開濟美忠孝之道歸焉非徒德色一階

而後耀閭里人耳目已也竊又聞國士之遇與上將之封恩止一身耳古人且終不忍倍況榮其身又及其親者乎壺飧鋪父與簞食遺母雖及其親恩止一飽耳古人且以身報之況享有祿養又錫有封爵者乎以此思報郭君當無所不竭其惓忱矣載籍所記若三命滋恭世篤忠貞皆臣子受命之遺矩也予竊爲郭君願郭君勉哉

雙鳳編序

頃玉叔自金陵寄雙鳳編至啓而視之則所與元美先生倡和於鳳臺作也夫鳳神鳥也文有神而文人

之遇合亦有神故玉叔以遇元美爲奇元美亦自謂
得玉叔晚聲應氣求和鳴盛世翩翩雙鳳哉門人勒
而傳之可謂好事也已予於兩君子皆通家而犬馬
齒差長故雖伏在丘壑不爲所遺且楚去金陵一衣
帶水兩家述作並得時時相聞卽不及與雙鳳接翼
諧鳴殊無所恨獨憶玉叔故於敬美有深交在閩中
嘗有二龍編爲士林所豔今敬美化爲異物矣元美
傷不見弟猶得弟其友玉叔傷不見友猶得兄其兄
撫今思昔當何如爲情而予讀其詩若文有餘悲矣
乃元美又謂不敢以旗鼓當玉叔玉叔且有小巫大

巫之遜兄事元美而心師之語皆由衷而氣亦兩相
下豈諸少年憑軾之客所得窺乎至玉叔以纂史望
元美元美以薦天下士望玉叔則尤盛世之希音也
命之曰雙鳳蓋有取焉予又聞之楊雄曰君子在治
若鳳在亂若鳳爲能隱見以時今元美踰耆力謝太
司寇以歸玉叔方壯盛起大廷尉入次公輔或翔千
仞或巢阿閣則各以其時爲隱見而於鳳德交相重
也謂是編者又安得交人兩君子已哉

黃先生易經崇雅稿序

漢人有言學經不明不如歸耕謂上以明經舉士士

以明經應舉經固用世之先資也士有弗明弗措耳
夫明經難矣而明易為尤難蓋易畫無文而為文字
祖易書不盡言而為五經鼻祖函三才之神理統四
聖之心傳潔淨精微廣大悉備自商瞿以下雖老師
宿儒罕窮其奧何論經生哉乃吾黃先生則年甫踰
冠卽用易舉進士高第出守吾州每公暇輒進諸生
示以所著易義諸生無不竦意而北面宗之不啻奉
以為指南而信以為神物競相傳錄頗為傭書者病
會有池陽生蘇至昌來省其父因得受經先生請其
副幾二百首鋟梓以傳名之曰崇雅稿書成造予請

序顧予耄矣獨嗜文之癖未盡捐手而誦之喜心勃
勃動蓋先生蚤慧若自神授而師友多大方名家業
振顙門辭根性術而又搜三古之遺察五運之變業
既深於易矣乃能匠意結撰無一不中窾且多畧傳
註而成趣超卦爻而成文化圖數而成象其機蓋在
牝牡驪黃之外而心手疾徐之間非若經生飾說已
也故挾策不再試亟爲制科所收茲貫雕之手盡聖
之斤乎夫以老師宿儒所難而先生獨從英妙得之
非神授不能矣予又竊謂下筵生與池陽生並得遇
先生而以經術授之似亦有天幸昔丁寬以易東許

田何馬融以易南許鄭玄而二子卒以易學名東南
今先生之易當在下雒池陽間諸生其好負先生哉
賀武昌太守若常韓公考績 加恩序

韓公自法曹出守我武昌三年當報政 闕下會兩
臺使議謂武昌楚首都任既繁重而歲又大侵所部
十州邑饑困之民方嗷嗷然託命太守何可使一日
解郡符往也請得留其行而獨表異諸政績聞

上上嘉悅之 賜璽書褒勞稱治平第一 加爵其
父承德郎爲中憲大夫母安人爲恭人蓋可謂名實
相副榮矣郡父老所任心德公旣幸公留尤幸公被

恩命喜色相賀聲洋洋載於塗其條張君某君聚而
歎曰茲父老之心哉夫大厦成而燕雀喜風雲舉而
龍虎從物有固然顧吾屬日奉公董一之令以爲吏
師用分其猷以共乃職幸而罔有缺失皆公賜也公
榮與榮豈其在父老後乎於是走使致幣山中徵言
於予予訢然起而拜使者徵諸君且欲有所託而報
公敢不拜命之辱漢紀太守吏民之本則所部諸長
皆以親民爲吏事而太守得討其良否而董正之職
方氏郡縣名義亦曰郡者群也民所群往也縣考縣
也民命所縣也夫民命縣於縣而群於郡其稱吏民

之本意深哉楚之爲郡者十五而我武昌政務繁重
倍視之又附在行省兩臺使藩臬諸大夫日臨其上
而與諸王宗及閫帥衛尉同城雜處且當水陸孔道
過使冠蓋絡繹無停晷亡論滯獄不易平逋負不易
責即抱牘請謁手板迎逆業已不勝其勞屬者歲祲
饑益以天行疹癘十廬之民男不得修農畝女不得
刈麻考屨而轉徙叢薄枕藉道路者不可勝計公來
適當其艱蓋三年無一日不憂兒顏色其最幸者公
所欲爲民便宜補救朝受質於上夕布令於下一無
所壅闕而吏民並受其福則又視諸郡爲多蓋公其

才開敏其度廊宏爲能勇於肩重而不自功捷於剖
微而不自智確於持謀議定危疑而不自矜許遇僚
屬坦然露心與士大夫恭而有禮字所部饑困之民
真若疾痛之嬰其身計不須吏祓除之歲時發帑金
乞糴境外分賑諸屬又令民周行平糶法自相保卹
所全活不下千萬人尋遣官分視疹者葬之殮者輿
而瘞之父老相聞未有不涕泣誦恩澤者至奉部檄
督逋賦公又愴然感額曰民益不堪命矣吾安得比
迹古之良二千石使吾民安其田里而亡歎息愁怨
之聲哉乃爲之時緩急寬期會如不得已而取之父

老從饑困中聞公仁人之言又莫不涕泣相告吾儕
小人寧湏吏無死毋寧負公以故武昌宿逋責在諸
郡後而輸反在諸郡先蓋公以撫字來之也公故法
家每從請謁逢迎之隙晏坐堂皇諸質成對簿之徒
鱗集其下伺之公以次召訊立得其情而哀者辟者
咸自伏吏人宛舌屏氣一無所緣絕爲奸故庭無留
訟獄無冤民蓋公以明允平之也頃江州大盜二百
餘人越境鈔劫震驚我土地而其守相將且姑息庇
之公毅然約會境上面折其不法守相皆有慚色盜
竟伏辜所部一二墨吏公初猶善論之使自新已知

必不悛也遂趣之使自引去公三年之績所爲最大
且著者類此何嘗一日不爲民哉故曰以仁行法法
亦仁也以法行仁仁亦法也太守吏民之本微公其
誰稱哉且爲人臣得君有道在得民爲人子顯親有
道在自顯此考績之具所以慎辨幽明而還目所吏
臣類皆右循良而左精悍盖有爲也昔者王良造父
天下稱良御乃若鉗且大丙則又除銜轡弃鞭策而
能使車騁若飛馬驚若絕朝發扶桑莫入落棠此殆
假弗用以成其用者也御民亦然今天下豈少良二
千石哉顧非用民則自用而欲如我韓公則且丙之

神御也難矣難矣公旣以報政遇主被非常之恩旦夕且召拜公卿去如龔黃故事父老何敢望借留第令我武昌與潁潑齊名亦公之遺也謹書此以待史氏

林母徐孺人八十壽序

莆田林生元世居業南太學從吾兒士良遊甚驩顧念其母徐孺人壽躋大耋遠在數千里外不得歸而從其兄稱觴於庭意軼軼不自安也因介士兒謁予再拜曰二孤非母氏不生而母氏聖善劬勞非名言不顯願徼惠先生一言爲母氏壽茲不獨母重而二

孤將奉以爲正珍人子之心如是豈先生所弗與乎
予初猶難之而生懇懇未已遂有感而歎曰林氏其
以慈孝興乎蓋孺人出同邑故家笄而適林處士省
非公爲元配蛇順柔嘉動合士行事二尊人曲極孝
謹大得二尊人心屬處士公身爲家督歲計食指不
供乃懷資及解孺人簪珥買行江淮間孺人躬自操
作庀其家日手調滌瀡承二尊人養二尊人益喜謂
有婦若此兒出無內顧憂矣會處士公每有天幸賈
常倍息而歸孺人率用勤畝佐之貲殷殷日起賓客
交遊日益衆因割其產之半以益季弟而猶稍稍推

其餘以急宗鄭之貧困者人言處士公好行仁義孺人寔贊襄之賢聲溢閭里矣顧孺人三乳皆女不宜男處士公業已逝艾而猶念與孺人敵體而起貧約未忍言置妾孺人則先意從史之茲其時矣奈何以一貧婦故而忘宗祧遠慮乎於是始爲處士納蘇氏蘇氏入而孺人第以女第畜之食息進退咸得從容自如曾不踰三年蘇母連舉二子長卽邑諸生顯世次卽太學生元世處士公時時抱二子歸功孺人孺人輒舉手加額曰此皇天祚林而林先世種德之餘慶也貧婦何力之有焉後孺人視二子襁褓中恩勤

備至不知非已出比二子稍長日依依孺人前亦不
自知其蘇出也未幾處士公下世孺人哀殯如禮不
使二孤它日有遺憾比其時年已踰耆不樂親細事
而以一切家政畀蘇蘇代其勞而孺人特總其大督
耕織謹蓋藏穡出納而已已乃延經師課二子業儒
居恒述處士公遺命曰此子也才惟爾不才亦惟爾
今乃公雖不祿言猶在耳兒忍負我使我負乃公乎
且乃公儻極艱苦以有家貽爾爾但飽其餘粒不思
起儒術一振之非夫也勉矣以故二子大自警勵雖
循循逢衣徒而綴學屬文並有佳譽取榮名而揚世

德蓋可計自待焉吳子曰孺人丈夫女哉叔向賢大
夫也其言言多而辭賡子有慨乎母性之不廣也
詩不可以觀乎夫樛木之願多福螽斯茅苴之樂有
子孫由妃性遠下廣也然廣於婦德亦難矣太史公
有入官入室之歎無亦人情乎如其性不必廣卽江
沱無悔心而小皇爲怨耦操并曰而不知勞膳鵲鷖
而不知夙將至秦越其所天而立殄其祀不顧世殆
不可勝數乃孺人獨有大造於林氏豈非林氏天幸
乎予聞林生言蓋不勝其歛衽矣夫孺人之大節在
廣至爲處士公有家有子而猶代其夫就養二親義

方二子廣矣而又廣孝友於昆弟廣施予於貧乏可不謂丈夫女哉此多福多壽之徵雖期頤不足爲孺人算何言大耄乃林生德其母深而祝其母無算亦惟是母能享之林氏其以慈孝興乎

奉賀武昌太守若韋韓公入覲序

漢制太守治郡有行能者滿歲爲真選滿三歲則課最爲高第又最者爲異等乃得下璽書褒獎增秩賜金而復以時召問使有所陳對而知民事艱難吏治名實尋以次徵拜公卿而行能錄錄者無與焉爲能宣明教化惠養元元則所爲問遺老諡故實者必備

而爲天下治安計必完卽恩澤殊常簡託重大彼蓋有以勝之故三代以還吏治莫盛於漢至稱功名損於治郡則吏不一二書而其人相業光美卒亦垂竹帛不朽我國家經制損益三代而重親民長吏實錯舉漢故事用之而獨召問陳對於諸長吏入

覲時一再舉故由行能異等而出入將相書勞盟府與漢史相輝瑛者不可勝紀享國長久其繇是乎予於是知吏治之重無古今一也竊公守我武昌凡四歲業已用行能異等受天子最上褒恩蓋需次拜公卿時也會嘗入覲脩歲事所部十州邑其父老

皇皇焉聚族而相告曰公吾天也今且入朝吾儕
小人將焉依其長吏聞之亦皇皇焉聚族而相告曰
公吾師帥也今且入朝吾儕小吏將焉恃蓋知公
入當列內臺而華旆熊輿不復楚也因設祖漢陽門
爲公舍較戒途而以贈言屬吳子吳子曰吏民之情
如是哉予不佞伏在公宇下公不以衰廢見遺歲時
勅有司存之又從行縣枉駕與之飲予故不獨知公
負天下才而猶心異公躬行古人廩廩有德禮長者
之風焉夫公故法家然內明外寬治郡持大體不設
繁苛之條不下操急之令目撫諸俗吏之小有才者

類多工獵名而鮮情實徒足以澆淳散樸傷國家元氣一切耻爲之第身先節約以爲所部諸長吏風又好揚善匿過全器使卽承吏奸利失職不遽案治之姑嚴諭之使自改圖其卒自授文罔則又不以私庇其親民若慈母之字嬰兒察饑寒燥溼而以時乳襦之諸所爲救荒拯厲省刑息訟調徵額清弊源禦盜賊姦宄勞神焦思曾不遺餘乃其用法平用恩益廣吏民無不爲公輸心腹者以故四年之內十部之境受旱潦而不至流亡望烽燧而不及荼毒且也郡附行省公不知其爲大政倍十五城公不知其爲繁盛

使監司日臨於上賓客使臣日載於塗公亦不知其
爲擾此尤非才智所能盡運而公之所以稱異等其
必有道乎昔漢宣帝召問龔遂何以治渤海遂曰皆
聖主之德非臣力也帝以爲長者之言今公入

天子必召問公公宜有所陳對豈徒若龔少卿之譏
讓已乎夫少卿之治渤海先得請如所願一切便宜
從事無拘以文法故能自行其意布德宣威使盜賊
賣刀劍而執鉤鉏民用安土樂業今以武昌視渤海
非止有盜賊之患而且不得自便宜也公其以武昌
之難與公之所以不難於武昌者對乎蓋武昌吏民

不能一日忘公公亦不能一日忘武昌第得藉公之
靈 天子使代公者如公來卽武昌之民安而龔少
卿再見矣且少卿之對蓋用者酒王生言也予自度
不及王生然亦爲父母國之道也公能王生予言乎

奉送州大夫汝礪黃公入 覲序

公少負雋才弱冠起鹽官就試督學使劉公劉公奇
其文而以國器與之未幾舉明經連登進士第海內
稱劉公水鑑矣會謁選當得除內秩大家宰一見而
識之曰異才也不使親民事問閭閻疾苦饜國家故
實而徒以鄙吏狙之恐不足以廣其用世資非待異

才之道也因授公知興國州事 命下賀公者或曰
子以經生釋儒衣冠曾未數月剖符領郡乘軒駕五
馬巖然稱楚牧伯不已重乎公默然無喜色難公者
又曰善宦者避外而趨內今子甫輟吾伊遽操案牘
日與丞史吏民相質究豈其所嘗習而豫園之母乃
難也公亦默然無難色退而語人曰夫賀我者少我
而故豔之也難我者少我而姑嘗之也少則少矣古
不有年二十餘通達國體十八而棄繻請纓者乎此
猶易易也又不有十二而定策取上卿七歲而爲孔
子師者乎夫少何可量也有 王命在吾往矣柰是

趣駕入州州父老望見公英妙若瑤林玉樹光彩映
人簡重又若底柱之峙三門屹不可動莫不舉手相
賀此福星也州自此振矣公因首問民瘼知累歲不
登而旱虐尚未已問然念之身自齋沐除壇請雨考
禮登百神而雪禱之居必側身出必徒跣日百拜於
路不以爲勞州人無貴賤無老幼皆冒盛暑從之公
益憂見顏色禱之踰月天乃雨耕耨者稍稍穫秋作寄
命須臾會又迫上官期會督責徭賦檄下不啻束溼
薪促大弦也公不得已慙容應之始雖見謬嚴急已
卽安於先公後私之義徧至而輜輳焉卒之鞭箠不

施租吏不擾人人反自喜以爲便訟者在庭公置對
會無費辭第據案劈劃各申其隱鮮不惶恐自伏公
又寬其罪罰遣之用是法日平訟日減囹圄幾空暇
日延見博士諸生與之談經術課公車業手爲繩削
而評品之使各竭其才而日趨於大家蓋人人父師
公矣公又於士之無家者粟之於神之廢祀者廟而
裡之而猶不受請託不納問遺不畏強禦不責苛細
至遇賓客入境供帳厨傳徒御之屬厪厪取成禮一
切不欲以民力養交與僚佐士人交初若重體貌一
無所假借已而卽之則洞然披心不設城府人益驩

然樂親之其他惠政未易僂指數以故任未二年上下交譽兩臺使察舉廉平行業已爲三楚最以予竊窺公諸所事事了無成心多自率其天性迎刃解糾紛懸鑑照情僞而已故令卞卽著龜無所事察政出若已成事無所事創卽當世所稱老吏多歷世故備嘗艱苦者遇之鮮不自失誰其少公將無皮相而已乎予嘗聞之士始入官如入閤室久而愈明明乃治又聞齊居使子奇治阿已又使使追之還報曰臣見所與共載者白髮也夫以老者之智而少者決之是能治阿矣今公入官不待久而能明治郡又不資

老者之智而能決在古人且難何論老吏且也州處
楚東垂介在山谷僻陋跼蹐最下壤也公以英年用
餘力守之曾無秋毫厭薄意譬則舉兩牛之鼎烹鷄
執擾龍之仗御馬輿誦在田野薦書在一朝堂茲且
戒期入覲 聖天子將遂寵異之父老皇皇然恐又
爲通都大藩所奪雖欲借寇其道無繇方聚衆而謀
遮留公未有當也屬其僚黎君吳君以幣造予謂將
具酒脯餞公於郊問言不佞夫僚佐之情亦士人父
老之情也予何敢以毫辭因擬公牧政之大者論次
之授二君以助輿辭

<p>...</p>	<p>...</p>
<p>...</p>	<p>...</p>
<p>...</p>	<p>...</p>
<p>...</p>	<p>...</p>
<p>...</p>	<p>...</p>
<p>...</p>	<p>...</p>
<p>...</p>	<p>...</p>
<p>...</p>	<p>...</p>
<p>...</p>	<p>...</p>
<p>...</p>	<p>...</p>

觀無洞結...

...

鹿巖洞續集文部卷之九

武昌 吳國倫

渝州 馬攀龍 刊校

序文九首

劉伯子義草序

往歲劉伯子翊成永逢承從其世父過予予止而觴之卽遂循俎豆間修長幼之禮甚遜然予竊異其風神韻宇飄然不群業以神駒繡虎當之未幾舉明經高第且出馮太史之門客有傳其先資之言者言言雅馴中矩矚奇氣古思鬱不盡吐經生正業固當如

是操此以射澤官破的必矣會又下帷三年秣馬再
北乃以近草一帙問序於予予因得縱覽焉初若然
犀牛渚而照水怪忽若穿井而聞仙家雞犬聲已又
若涉海宮而呼鯨八淵客相對作隱語瑰詭萬狀驚
世絕俗蓋九州之內所不必有六合之外所不必存
也異哉伯子之才乎惜予耄而少文不盡知其解耳
夫謂經生正業為制義也者不倍之道寓焉故上有
所制不得過求諸士士亦有所制不得過用其才有
如師心匠意馳騫高玄經傳不足而之左國左國不
足而之莊列莊列又不足而之越絕齊諧秦碑汲冢

一切金石幽怪之文皆得剽剝而粉飾之見以爲神
奇顧獨調制何予故奇伯子才而充奇其過用夫伯
子其才無人過用何病竊慮夫才不伯子而過猶伯
子者去制遠也故居取安土不必崑閬姑射永取華
身不必火浣吉光昧取適口不必天漿玉醴仙槎靈
瓜惟文亦然取應制而已何至苦心極力使人不可
解乎耄夫胸中故無一奇每見奇輒駭異談奇亦多
拘攣非通方之見也乃欲驟爲伯子益友殆有深意
焉吾兒及二三門人則又進而言曰伯子異才也在
國則斂其華以應制在野則變其體以自娛是草蓋

其抵掌也而非其捧心也噫嘻有是哉奇而又奇矣
因併述其言以告伯子

魏澂江近體詩序

蒲圻魏文可氏故按察順府公伯子也起家明經凡
佐三大郡用行能高等擢守滇之澂江且二年牧政
稱西南最屬其意已倦遊每上記請疾輒為臺使監
司所固留乃得卧理清晏坐牖行歌益肆情於述作
因東其生平所賦五七言近體詩若干首成帙命之
曰怡雲亭稿時予門人姚允升適為其屬路南守因
得請其副傳之走使萬里問序於予且曰魏使君願

受先生彈射而後殺青先生其留意焉嗟乎文可之
於詩其天性乎昔在嘉靖中海內五六子講藝

闕下順甫雖後至日懷鉛操觚從之未幾詩且鴈行
五六子歸而有雲山堂稿傳於世卽其邑之先輩若
魏蘇州廖學士皆有所傳然視順甫少遜矣乃文可
不藉師友聞詩於庭而能專心致志以承之閱二十
餘年手不停揮日不輟詠蓋所謂家學世業與性成
也頃猶削草過半而僅錄其精者存之庶幾選鋒待
敵割腋備裘矣予復奚所用彈射耶雖然文可之志
未已也其必取資於予則知己之言也客有曰使君

擅諸體而獨以近體示人將有待乎予曰昔者齊宣王好射用不過三石而左右譽以爲九石王悅之夫射用三石不爲無力人矣其以三石而蒙九石之譽卽以近體而冒諸體之名茲齊王之所悅而文可之所耻也乃其志猶不以近體徇也奚病焉客又曰近世諸詞家類多馳騫怪譎高自矜許使君獨取唐正始大家所爲清平調而諧聲依律赴之若有所制而不一縱豈猶不盡用其才乎予曰相馬不論足力而以毛澤爲儀則廐無千里矣相玉不論貞粹而以徑廣爲儀則篋無連城矣相詩亦然文可善用清平調

庶幾騁稱德玉比德乎乃其志猶不以清平徂也奚
病焉客誠予言而起曰先生知使者何但知詩予曰
士之相知難矣子思子不云乎龍穆好飾弄相人眉
睫以爲意天下之淺人也而公叔子親之橋子良修
實而不脩名有若洪鐘不撞不發天下之深人也而
公叔子與之同邑而弗知今天下之親龍穆者多矣
若吾文可生平不好弄而脩實不輕發若洪鐘又與
予同郡稱通家子予故以其人知其詩以其詩益知
其人也客三歎而退予因具述以告路南君而自附
於文可知已云

韓氏哀感錄序

昔者曾子南遊於楚北嚮而涕泣曰非爲賤也悲不
逮吾親也閔子三年喪畢孔子與之琴而知其哀未
盡夫曾閔孝矣豈必後世無曾閔乎予觀韓氏哀感
錄而知孝天性也其有所感而哀生焉則天性與曾
閔同晉勲其庶幾乎蓋晉勲祿仕不逮毋封爵不逮
父風木之恨將與天終而其師友親知匍匐弔之爲
狀爲銘爲表爲誄並爲晉勲寫哀頌晉勲又使予作
傳傳成合爲一帙授剞劂氏每一披誦有餘哀焉因
命之曰哀感云予故不文不足爲晉勲重乃諸名公

皆鴻筆鏗然金石爛然華袞爲晉勲親也者於是乎
不殯然益足以動晉勲哀記不云乎墟墓之間未施
哀而民哀錄之所載儼然墟墓景也若夫泰山之薪
者以哭而動孔子哀齊人雍門周以音動孟嘗君哀
彼猶其疏者也思哀則哀至而况祭諸天性者乎所
曼容亦曰孤者易傷感茲晉勲之哀所以不能自禁
也豈徒哀之且思所以繼先志以提其躬而脩其職
不忍以一介傷清德不敢以一念負幽靈而民且嚴
君事之慈母依之古聖賢論孝而及事君忠蒞官敬
晉勲毋忝焉夫有所授於先君子至章明也異時經

營四方夾輔王室與其先君子並書國史顯名世世
是歸其前茅矣

送別都大夫叔見張公序

古語布之問御於馬問治於民蓋御之工拙惟馬知
之吏之廉濁亦惟民知之故無俟它問賈誼之論大
政亦曰民者吏之程也察吏於民取其愛焉十百人
愛之則十百人之吏也千萬人愛之千萬人之吏也
虞考績周考成漢考課率用是道而漢猶有遺憾焉
輒近世難言之矣夫吏親民而亦親於民輶軒使者
入境而知淳澆察眉而知寬猛觀耕稼而知勤惰采

風謠而知勞逸庶幾名實相副上下不得相偷豈惟
涉者安其位而黜者亦安其心矣今不問民將風聽
諸臚語而已乎卽臚語猶兩可一爲愛憎之口所中
夫實遠矣夫人情何常之有同已則生愛異已則生
憎愛者譽之憎者毀之吏脩其職不暇安得人人而
同之而保其無纖芥乎叔見張公三仕楚而所居民
戴所去民思在郢爲良令在下雉爲良牧並樹生祠
尸祝之比佐武昌又六年兩臺使累薦其治行
天子且兩下璽書褒之公何負於民也乃踰六年不
遷而考功氏大計置之調籍報至人盡駭之莫知其

解夫不奪其官而量移其地考功氏豈盡無意乎第
未親問諸民而以衆人遇國士耳邇郡士民皇皇然
惟恐公掉頭納綬去泣者盈巷挽者塞塗劍劍兩臺
諸監司而乞留公者千餘人兩臺諸監司亦莫不泣
下議欲如河內借寇故事乃公之去志決矣夫民情
如此而朝命如彼薦者欲加諸膝譖者欲墜諸淵嗟
乎豈計吏獨非爲民乎言者子思謂申祥曰公叔子
以人口親敬吾則亦以人口疎慢吾漢文帝召季布
無所受辜罷去布因進曰陛下以一人譽召臣一人
毀去臣臣恐天下有識者有以窺陛下此其旨大類

張公事而人情之不測尤有甚於此者予又聞歷陽
化湖賢智與愚闇同溺巫山縱火膏夏與蕭艾同焚
茲適然之數公所能順受也扁鵲天下之良醫也不
得與靈巫爭用鮑丘秦之德士也不得與趙高爭能
則儻然之遇公所能達觀也乃若樹木者疇以腴壤
灌以潔澤方異其干雲霄也一人拔之遂無餘蘖治
犧樽者鏤之歆劂曲成文章方異其登几筵也一人
舉而毀之曾不若溝中之斷故天下之憐才者終不
能勝夫忌才者也豈亦公之所能盡平平亡論公諸
上官下民中僚友胥爲公有深慨矣公且行僚友將

出錢於郊使使問言於予予曰公蜀人蜀道之險公所習見而舟車所親歷者無異康莊矣今世路何如蜀道願公一以康莊視之舟不以失舵而棄川車不以折軸而棄陸展禽不以三黜易直道子文不以三已生愠色彼其予奪險夷我者非我有也而我所有非人能予奪也非地能險夷也况公遺澤在民輿論在上官僚友內不愧心外不損譽歸而奉老親抱稚子樂也出而無徵之官宜力荷勳公亦樂也進退豈不綽綽然有餘裕哉予習公最久而知公負達節最高不作泣路書空態故得坐進此言以代分袂云

陶長公寓黃集序

陶長公懋中於予故未有交屬兩都人士有稱其富
詞才而高視一世者予竊風慕之比量移黃州且三
年始一通郵問則長公不待面而莫逆矣未幾長公
偕友人王行甫來見訪握手飲北園盡一日夜別去
予視其意氣激昂風襍峭直談藝則易牙之辨淄澠
品才則造父之別騫駁予益心下之每歎其爲風塵
外物然知其不免於世也已從行甫得長公寓黃集
讀之則自耿尚書周尚璽梅給舍周侍御以下諸名
人業已章評而目注之或謂其振家學而操國器或

謂其高行能而兼博雅或謂其借形勝而發天才或
謂其抒性靈而成仙籟各極褒美而無一語浮其實
固宜其膾炙人口而黼藻人目也乃行甫又屬予序
豈予復能贊一辭哉蓋行甫嘗爲蘇長公編寓黃集
予寔序之今長公以直道寓黃與蘇同而以詞才爲
黃重亦與蘇同而其所不同者長公不作宋人語也
序何辭且晚近士志在漢唐而由宋入蹊徑者不少
豈盡其才不慕唐人者哉不得其門而入耳長公旣
得其門而步趨之而舞蹈之駸駸躋堂室則不獨以
才勝譬則蒲且連鳥於百仞之上詹何鰲魚於九淵

之下庶幾應心應手而盡其技也乃其微則有形勝
所不盡著竹帛所不盡宣者故夫爲平者準也爲直
者繩也若其不徂於準繩而可爲平直者則不言之
術也叩官而官應彈缶而角動此同音者也至於五
音無所比而二十五弦皆應則不傳之道也長公其
進於此乎而視漢唐咫尺矣何論蘇序成長公以有
所中且納綬去黃黃千萬人借留不得予聞之而有
深慨焉予固知其不免也豈有風塵外物而能久處
風塵者乎昔老萊子調齒以剛折舌以柔完子思曰
吾不能爲舌故不能事君耳長公之不免也其亦不

能爲舌之效乎

居夷漫草序

袁山黎君實氏故善說詩尋以詩起家三仕爲文學官最後乃得稍遷中都天長令徃在盱江嘗介一使走千餘里問詩於予蓋託之乎知音不待面也予感其意草一詩報之垂十年不相聞問矣頃又自天長命一使來請序其居夷草啓而視之則皆寓清平時諸作也清平故黔夷地自我高帝闢而造之爲承冠之國弦誦之鄉者二百餘年而猶稱居夷何其在先朝王伯安先生寓龍場嘗以何陋名軒若實豈亦

有所感乎因憶予二十年前嘗奉簡書視黔中學遠
歷所部諸山川名勝盖有穆駿所不及周而漢節蜀
師所不盡下者心竊自壯焉至欲吐一詞張之則其
景未易敵且嘗三過清平與故人孫山甫王幼明把
酒稱詩累日夜不倦至于今香爐金鳳諸峰色霏霏
几案間未忘不圖君實武予舊遊而能以詩敵予所
不敵起予哉盖君實自少守家學有其父風又多大
人長者之遊爲能抗志古昔無通六藝詩多唐人近
體而卽無一語不唐乃其思親懷舊述旅悲時類多
翰寫性靈依傳倫理神情所會才美赴之庶幾有風

人之言焉又不爲唐體所狃予又聞秦楚燕趙之歌也異轉而皆樂九夷八狄之哭也殊聲而皆悲予觀君實居夷而不陋夷所爲詩且與樂歎之蘆笙并舸之土鼓金齒之弦篴迭相響應而其鳴皆條卽清角如曠吹律如飭無以易其悲樂之情予手而誦之黔山川又若驅而至前也謂君實不起予哉今君實由文學官而陟百里長去偏國而適通都其塗漸坦而其志漸舒采詩觀樂以待宣布中和有餘地矣其毋一日忘居夷意哉

愛日編序

往徐子築愛日堂居其親予爲之記未幾徐子且祿
仕爲天長文學官迎其親與俱卽養以三釜有喜心
焉比母氏中棄獨徬徨奉其父還里中日益有懼心
所爲送母事父具鮮有餘力已括所藏諸縉紳大夫
詞人墨士爲其親壽者得詩文若干首哀爲一帙命
之曰愛日編以示予嗟乎徐子之懼心深矣蓋其父
廷祥氏少與予爲布衣交今行年七十有三故徐子
知年不敢不愛日詩云欲報之德昊天罔極其是之
謂乎且古之孝子愛日非能謂義和而令安行也亦
非能增度數而益漏刻也又非能如新垣平魯陽公

測候撫戈而便日再中也第欲充其欲報之情親有
餘日報益有餘力卽分陰寸晷不以三公易不以萬
鍾加焉何論日故曾子一夕五起老子七十自娛皆
愛日之心爲之乃其不待之懼難言哉予於徐子始
有深感矣或曰昔者王符之著潛夫也曾以愛日名
篇何居予曰王子之愛日爲民也君道也徐子之愛
日爲親也子道也均之欲其舒以長也異時徐子得
君受事而以爲親之心爲民其所爲愛日不已廣乎

興賢錄序

興賢錄何錄興士之賢且以脩興賢之典而使士益

興也徐先生其有造於興乎蓋先生初以名進士出
宰越之鄞邑鄞故人文奧區樞機鼎甲之臣接羽造
迹於朝無不神明先生才而純美先生節者會以它
事正色忤郡守守銜之因得行諧而移先生入楚蓋
不知越人失之而楚人乃得之也未幾諧者之皐暴
著彈章而先生才節益顯其攝興事興士人又自有
天幸焉下車卽以治鄞之餘力解興大困者數事已
乃脩舉古循良之政問疾苦諮緩急躬行田野勸農
力耕民由是益親之而逋者漸輸訟者漸自解去日
坐堂皇若無一事者先生曰何興民易德如是豈非

予卧治地乎而興諸士乃得從容曳裾操鉛槧日造先生問業先生益大喜因與諸生分日爲程談經課藝累數月不倦諸士遂多斐然成章者先生因錄其成章之尤者數輩而擊節賞之曰興多賢哉遂衷而傳之吳子曰興楚商瓌也何敢言多賢由先生不自賢而後見興多賢耳夫玉人剖璞得玉爲其能相璞也珠人披砂得珠爲其能相砂也豈其漫無所擇而槩以爲珠玉乎予意先生相士而得賢其有所試矣予因告諸士其益勉自進修毋負先生興賢意且諸士不聞里人之與頌先生而願尸祝之者乎夫民且

易德而士居其先必有以三鱣頌先生者先生自此升矣先生名庭綬字公綰豫章信州人

冠山人詩序

山人家龍平山北枕大江去予廛廛百里予雖久耳
山人名未嘗一面蓋山人自少好遊託迹遍燕趙秦
晉齊梁之墟所與交多賢豪節俠士而所爲筆海墨
林則天下名山大瀆且載也奇氣壯懷鬱而爲詩類
多豪宕磊落語每一篇出聲動侯王公卿而予友肖
甫司馬助甫秉器兩中丞並推轂之山人用是名益
重交益廣輒不勝自喜往往揮金躍馬從諸少年游

買醉邀歡歌呼踴躍蓋一時布衣之雄也越十年餘
興盡而歸惟有奚囊詩草存耳山人其先故素封一
旦垂橐而入縣釐而居又能晏然忘貧築二餘齋以
自廣謂無祿有餘富無官有餘貴也坐卧齋中不廢
吟詠而其社友張太守子龍暨饒汝順諸茂才時時
裹飯齋酒脯造而覓之未幾王行甫以山人來而予
固恨交山人晚也比見山人豐頰長髯風流慷慨儼
然訝以爲富貴人二餘其有謂哉因與之飲酒談秣
累日夜不倦已閱山人諸詩則風流慷慨如其人豪
宕磊落如其游率自任其天真而神情符彩互發交

快美矣美矣業心許爲贊一辭踰三年未就乃山人
歸而精求之若有超悟取舊草焚其半而更定其半
携以示予予誦之則鏗鏗有餘音也按之則穆穆有
餘思也何山人奇進一至於斯不獨如其游如其人
矣因醉之四十日而序其詩曰山人豈楚人哉夫侯
王公卿下山人而山人不知榮天下名山大瀆奉山
人而山人不加恭乃必窮而歸歸而取質不佞而後
精求之豈予敢有所引山人自躍如耳且予聞之善
學者用衆等之食雞必千蹠聚狐必千腋也山人取
材諸名家善用衆矣而獨取質不佞將無善用寡乎

彼郢人之聖非匠石不斤匠石之斲非郢人不質蓋
所謂兩相取也予老矣山人勉哉

傳文一首

左司馬熊公傳

初予從公釋褐蓋遂同邸舍云公雖長予十七年曾
不予少相與評臠古今抗論天下事得失難易無不
在其股掌心竊壯之其後公三入計三遇予都下道
故益歡最後公開府嶺外予適守高州親見公削平
大寇功成病卒行間當病革時猶手書數行與予訣
嗟乎茲所謂死生交也予旣爲位哭公屬道遠不及

臨又數年始得從里中再上公冢竊有餘悲焉其伯
子熾始授予簡使作傳夫公非予傳而誰也按公姓
熊名桴字元乘別號鏡湖居士武昌人其先晉陽人
自和叔公徙武昌凡四傳至南海永清卽公父南海
公居官居鄉並有遺德兩在皆俎豆之娶萬孺人生
三子而公其季兒時卽沈敏端重不習爲嬉遊會從
南海公之官其長吏一見而奇之已從經師受詩爲
文一出卽試爲諸生冠後嘗以廩讓其友李生邵生
尋以貢讓其師周生每居親喪毀瘠不勝禮至析產
多所推讓兩兄又多賑恤諸宗人蓋自未第而邑士

人誦慕之矣嘉靖癸卯舉於鄉庚戌舉進士除太倉
守太倉吳劇郡公身先勤約下令䟽重役節供億清
浮糧禁吏民不得爲奸興學勸能郡一切辨治壬子
夏六月島寇卒犯吳公始有憂色曰吳自此多事矣
蓋知吳以佳麗餌寇又晏安久人不知兵寇一再深
入吳卽不爲沼倖也乃預戒其丞史繕城厲兵爲保
障計尋奉軍府檄提兵吳淞江劉家河並用水陸師
大剿賊鋒走之明年春三月寇再入犯嘉定上海殺
裨將二人肆行剽劫公曰事急矣如待檄而行使賊
得先我非計遂自勒兵分二路翼擊之賊稍失利去

會大寇數十萬據寶山三吳震恐而州衛將士悉調
集軍府備非常徒以空城委公公憂之適操江蔡中
承來視師民方藉以同志公因號召民間義勇實城
事未及集而盜數千薄城下矣公悉發城中壯丁守
陴身自冒矢石巡行樓櫓增飭諸械備是日雲日黯
慘蔡虞有它變謀逸出公以大義留之後見賊攻東
西南三關急蔡徑從北關夜馳去城中人無不自危
又其夜三關内外一時火起衆益洶洶疑賊已入城
至訛言中丞公且走吾屬何坐因爲公手劍厲聲叱
之曰中丞公出爲調大兵援汝何言走也有言走而

惑衆者僂以徇衆遂堅守累日夜不倦寇始解圍尋會諸將追擊之殺傷畧相當踰年寇又至諸村落及旁邑之民來奔者且數萬公令開門悉納之城上用火具城下設榻伏竟破賊而完城如初後賊逸而蹂旁郡旁郡人謂公實遣之適蔡中丞坐太倉罷恨公因嫉其所善孫御史采旁郡人之言論罷公朝議不以爲然又吳父老爭赴闕爲公懇會軍府奏留䟽亦至得不罷然已不復視太倉事日與諸將治兵寇至則擐甲荷戈擁兵迎敵寇退則登名山臨勝水賦詩長飲慷慨歌呼未幾以功擢蘇郡丞尋擢河南按

察僉事兵備蘇松會島寇繼至橫行江淮公會諸路
兵日夜追擊每出奇計勝之東南軍氣由公日振又
密贊軍府以計禽巨酋王直滅其黨軍府累上功狀
上三賜白金文綺擢副使治兵如故無何蘇州民亂
福山吳淞崇明兵亂公皆不動聲色平之後金山軍
叛於松江挺刃逼部使者索餉部使者錯愕無出公
第令開四門傳檄諸軍還衛轉餉且至矣諸軍解去
公立遣党別駕部餉往比至諸軍又執党以叛兩臺
使危之公乃單車馳金山諸軍業已釋党蒲伏道迎
公公開誠諭以朝廷威法因得一二倡亂者鞭之

而衆復擁噪門外公正色曰諸軍得無有所苦而欲入自白狀乎其具以牒來衆畏署名遂自解公因密諭將吏夜捕首惡十餘人誅之旦日勝宥其餘遂不復叛盖公居吳十二年凡再保危城五定內難身經大小三十餘戰斬首虜三千四百有奇建崇明福山川沙柘林吳淞五城開楊林瓦浦虬江白茆四渠補坍海田賦二千二百有奇吳人恃公爲長城而所存尸祝之不爲過矣時議公負文武才當起撫吳會會東南解嚴而雲南適有土官素儀之亂又擢公參政往視之

制府方調大兵俟公公至坐策之曰此

分未定鬻夷自相攻耳何足以煩大兵因檄素儀冠帶之使攝諸夷如守吏遂不亡一矢亂自定比摧陝西憲使則孫御史業已在要路因從大計中公左遷山東叅政時河塞徐沛間阻漕大司空朱公方建新河之議難其人聞公且來喜曰得熊公吾不憂河矣遂以三河口屬公公力任之爲蓬居河上日夜率吏卒分水土爲二工獎勤者以激惰者吏卒日夜爭趨事不少休竟鑿沙石成渠而又築土堤壘石梁分導三河漕遂達大司空奏河渠書以公爲稱首隆慶改元入賀上卽位遷山東憲使已錄河功進秩二品

戊辰遷浙藩左使會廣東有曾一本之亂朝議推
公拜僉都御史填撫之公聞命馳入竟一本方寇會
省急聞公先聲稍解去公因上平寇四策請帑金五
萬爲輜皆報可公遂先發千金分賑附省諸殘命布
令郡邑各拊循其民毋務精悍刻深傷國家元氣以
時平徭省賦行保伍法使民自爲衛敕諸將分造戰
艦百有六十備大舉區畫既定始遣將將步兵芟夷
高惠諸洞賊斬首三千舟師邀擊一本於潮海三敗
之連入閩公又奏改鴻雁洲安民鎮兩盜藪爲二縣
使賊無所匿罷遣安南夷月且檄其國備竟上勿使

一本得南於是檄樓船將軍會閩兵圍一本於馬耳
澳斬首虜三百有奇捷聞上賜白金文綺勞之一
本勢窮誘倭酋丘古所入寇惠州以勞我師時大兵
在潮公亟募勇敢士三千人自將入惠城以堅衆志
使使馳南贛求援屬材官周雲翔殺其主將以叛公
分兵守城旋大發火具夾攻雲翔雲翔敗投丘古所
公隨縱反間得雲翔誅之時南贛與他鎮會兵輾至
遂進擊丘古所斬首一千五百有奇其黨悉平捷聞
上賜白金文綺勞之公見一本未滅嶺海禍未已毅
然決策親督諸將進攻稍後輒懸軍法示之於是將

士出海殊歟戰遂克一本生禽之斬首虜二千有奇
焚溺可數萬顧捷書甫上而公勞瘁不支矣病數日
且劇猶自移檄理兵食不一言及家事以己巳七月
廿四下世距其生正德丁卯年僅六十有四庶民所
在廟祀公初上聞大捷嘉悅之進公副都御史比
訃至上惻然悼之下璽書臣桴以死勤事忠矣其
贈兵部左侍郎錄廕一子入太學詔有司爲起冢遣
守臣致牢祀焉嗟乎公不朽矣公內行甚修負才開
敏而有識畧爲吏廉幹善拊循然用法不畏強禦居
恒未嘗言兵而臨敵制變動中機宜雖武戾汾陽不

能過又馭將假體貌卒能得其死力知人器使有拔
自于夫長而推轂爲大將者至持重好謀臨大難不
驚居大功不伐巖然古社稷臣也配陳孺人有相德
生二子熾燠俱以廩入太學而熾尤孝謹博學善屬
文孫十人獲初太學生爲邑諸生者六人公之澤其
未艾乎

解部通志

卷之六

二十

解部通志

甌甌洞續彙文部卷之十

武昌 吳國倫 著

渝州 馬攀龍 校

傳七首

涪陵處士張公傳

涪陵張叔見氏守興國三年以最聞 朝廷累加恩
其父母及妻叔見憫然退而思曰仕小子奉職何狀
乃得微福賜爵且兩世其自先德茂爾因述其曾王
父廷璽公諸高義謁予紀而傳之按處士名璽字廷
璽其先蓋南昌世家元末有祖壽輔仕蜀阻兵不能

東遂家涪陵之五龍鎮傳生漢霖嘗以五千金助
高皇帝軍興詔旌其門而其孫鑒博學惇內行嘗手
纂譜牒修復古鄉校禮郡人士至今稱之鑒生九世
卽處士父以耆德屢延爲鄉賓娶包孺人生二子長
瑾次卽處士處士藉先世累資屬其兄以奢廢處士
勿問也而猶父事兄不少懈鄉先達尚書劉公岳及嘗
歎其友愛而贈之詩處士性又好義樂施予趨人之
急甚其私諸宗人饑者粟之曠者室之暴者衾紼之
曾不愛餘力嘗出直收其鄰何氏田已聞其婦姑相
抱泣也惻然折券還之里人給事中劉公旌以効逆

瑾忤旨罰餉米二千石輸邊處士聞其以忠受禍首捐百石助之而諸好義者聞而爭赴焉劉遂得生還後瑾敗復起爲江西副使從子昕嘗闢費官錢三百金郡逮治之杖且死處士走訴郡公昕無知犯法死則死矣奈吾伯氏不臘何願入田產七白金償官贖昕罪從之已昕出泣謝處士微叔氏吾爲獄鬼矣昕不報叔氏有如此日處士曰但得汝生幸矣豈望報乎以故處士晚年益貧困乃其妻何孺人則善慰之盡解其簪珥永襦易菽粟爲朝夕計屬其子孔時孔暉相繼蚤卒獨孔時遺一婦馮箠箠抱二孤孀居節

甚苦然處士蓋安義命卽家無宿儲亦不失其故志
馮嘗歸視其母母病且死挈囊金數斤私馮曰用資
汝孀母令諸婦知也馮歸以聞於處士處士立命還
其父曰豈有世家子而食人私金哉徐撫其孫之頂
示馮此亦千金子也後病卒行年六十有四二孤孫
長怡配羅氏次慎贈奉直大夫配夏氏封宜人曾孫
七人仕可卽叔見以鄉舉知興國州娶湯氏贈宜人
繼石氏封宜人際可勉可求可並業儒未成獻可行
可立可並庠生贊曰處士信高義哉太史公有言天
下熙熙皆爲利來天下壤壤皆爲利徃利之於人亦

大矣方處士富盛時輕財樂施恤內振外大者解直臣之危而脫兄子於獄猶曰舉先世之餘散之惟恐弗盡乃旣貧困無聊而志操益厲雖數十金不苟取則又何所爲哉晉端木叔棄累千金之家散之一國及病不能藥死不能瘞而受施者相與反其子孫之財嗟乎此千古高世之行也予於處士再見之顧端木見德於受施人之助也而處士之子孫則竟以儒術自顯儋爵分祿爲縣官用天助之也天之所就孰與反財者多乎

王孺人傳

孺人郭趙州妻姓王氏父曰遇春世居武昌郡之東門嘉靖甲申母郭夢文鳥翔其室以九月九日生孺人孺人生而娟秀蚤慧王公奇之每為陳說古今興亡及賢人列女諸名跡孺人輒心悟而通書記王公益大奇之謂難其匹會趙州公諸生時失其故耦將委禽或曰郭生貧而負俗獨奈何予女王公曰人固有魁傑如郭生而長貧賤者乎卒予孺人孺人既歸趙州公即布衣操作修婦職口不言貧君姑悅之謂得婦族富人嘗昧爽遣女奴之趙州所覘新婦何為則孺人業已結束上堂起居君姑供盥饋竊歎曰此

必興郭氏而吾諸婦坐敗耳趙州公有兩弟並不治
生而習遊冶公患之將析以資斧使自殖孺人曰姑
徐徐善導之不然見謂新婦不長者令若兄弟不相
容也後兩弟果出不遜語孺人但引續塞耳若不聞
卒厚遇兩弟久之兩弟皆愧悔稱丘嫂賢而宗鄴內
外賢孺人者一口矣每趙州公讀書至丙夜孺人常
合燭執女紅佐之不倦至飭家政雖織嗇必親若脯
醢菹蒲絲組麻縷以及衣襦履絢之屬罔不先期而
具以故趙州公得一切勿問而專精綴學成儒名已
而舉明經已試爲杞博士爲舒城令稍遷趙州牧孺

人皆從之官每謂公性峭急不能忍事恐難爲下時
時諷以佩章之義公亦降顏聽之稱益友會其丞不
職以私求蔽於公公弗許乃伺公入計使其妻修棗
桌之贅見孺人寘幣焉孺人受棗桌而反其幣曰幣
非婦贅且恐污長吏名也其人慚退不復敢吐一辭
比自趙歸爲兩兒娶婦每晨起呼兒下帷治公車業
旋勅兩婦率衆指勤動理家夜分猶秉膏火針刺紡
績汲汲如微時趙州公勸之休不休曰吾不欲諱子
婦情也不見某家婦逸樂終歲坐糜其先人之產而
終不自給乎年四十以後性更好佛喜施旦齋沐誦

諸品經日盱乃已見人貧有急輒不吝分橐裝濟之
諸親鄰待孺人而衣食婚嫁者數十家歲大疫諸扶
携造孺人乞棺者無不立應蓋人人誦陰德云居恒
不言人過聞人蒙難卽憂形於色爲之不食俟其平
乃復竊喜曰人孰無不幸哉已見二子經術成累試
得偶曰兒勉之彼朱門華轂而子孫多不振者善未
積也吾雖老猶及見若曹高吾里門矣萬曆壬午仲
子舉於鄉明年癸未登進士推擇爲翰林院吉士里
中人曰茲郭氏積德之報乎其冬十月孺人寢疾忽
謂其伯子曰吾其歸乎何神不吾守而嬰兒出也十

三日遂卒年僅六十趙州公名懋字子德伯子正位
府學生娶詹氏仲子正域卽翰林吉士娶張氏季子
正夏亦府學生蚤卒一女適郡將軍華峰三女孫並
幼嗟乎孺人之必興郭也知言哉夫女貴貞好不惟
其才而兼之蓋難矣予觀孺人高識美志行仁而好
施佐趙州公於微而又篤有是子使郭之二世並用
儒術顯名卽古所謂樂羊子妻公甫文伯母何以過
乎予與趙州公通家而重以吉士之請故得論次其
大者俟史氏采焉

勅封烈儒人傳

孺人爲劉大夫妻而伯子秉缺歿也頃伯子斬然被
哀經涉江叩予予睹其容稱其服與之對食則一飯
一蔬以往七筭不復加矣已避席泣數行下跪授予
狀曰茲先孺人遺行也不孝缺業不能身代先孺人
而充不忍其堙滅無聞於世願先生不靳一言華袞
之嗟乎孝哉伯子母德其益徵乎作劉孺人傳傳曰
孺人廣濟李氏女其大父淑嘗仕爲商水丞父萬善
隱於耕母劉以嘉靖癸巳生孺人甫八九歲父母相
繼下世孺人執紼與一幼弟相弔於室備嘗艱苦聲
不外聞久之徵仕公爲大夫卜相得孺人曰此真吾

兒耦也時大夫方困諸生食指不自給孺人日操勤儉佐之內事徵仕公彭太孺人曲極孝謹外供賓客每不吝解簪珥爲具至自奉不厭麤糲脫有弗繼雖縣甌累腹不言饑也視臧獲多所寬假而督誨三子則又巖峻不以姑息爲愛屬其弟病羸且不起孺人手調七藥進之因呼天而號曰李氏之不斬一綫耳天平忍復降割乎第病旋愈人以爲孺人孝感云辛酉大夫舉仁鄉第二人尋遭太孺人喪孺人相之哀禮並至隆慶辛未大夫登進士授中書舍人孺人從之京會今上單恩賜爵乃得奉 匱書封大夫父

爲徵仕郎毋妻並孺人也。孺人旣貴，猶以布衣蔬食爲常，而猶躬自漚麻辟纊，無暇日。或諷之貴家何自苦？乃爾孺人曰：非若所知。念吾姑已不待養，且不欲忘貧賤爲諸婦倡耳。已大，擢監察御史，被命巡行畿輔，與河南山東諸路屯一馬所至，風厲百官。蘇息萬戶中外，肅然敬懼之。會同官傅劉二君相繼彈政府下吏議，大夫慨然抗章救之，章留不下。蒲伏待罪者數日，中外兒女子錯愕，慮有不測。皆吞聲哭。獨孺人不爲動。徐諭之曰：臣從君，猶婦從夫。汝父直言供御史職耳，追恤其它，卽生死呼吸無復可悔，何以哭爲？

間者仕之幸 上意竟不罪大夫再命之按蜀乃政
府心疾大夫喜遂不待其報命遷山東按察僉事蓋
外之也之山東未幾又遭徵仕公喪還與孺人襄事
一無遺憾蓋孺人故多乳子女有寒疾比更二喪過
慟孱然骨立矣曩徵仕公善爲其子卜相固宜身食
其報如是哉萬曆丙戌大夫復起山西如前官無何
孺人舊疾舉益痼遂以其冬卒晉邸中時伯子卧疾
於家仲子秉鉞遊太學叔子秉鈐讀書匡廬皆不逮
與孺人訣獨度子秉鉞在侍孺人摩其頂而終焉蓋
鉞雖產異母而孺人于之甚恩故鉞亦母孺人不復

知其所自產也卒年五十有四月四晉諸王侯卿士莫不
賢孺人而哀大夫失良友爭相匍匐吊之而伯子則
有臯魚之痛不可解顧伯子業已博識工古文辭而
與諸弟並負用世器所爲不死孺人有餘地也何憾
哉大夫名天衢字一登今權陝西叅議位望隆隆起
矣

新野王妃邢氏傳

邢妃爲南陽衛指揮邢山女生而脩備類丈夫乃其
性獨柔婉貞順執牀下禮甚恭年十六奉詔封爲
新野恭簡王繼妃初王元妃李賢而蚤世妃悉遵其

遺矩脩壺內之儀謹事大母莊而撫元妃所生宣懿
王保愛益至莊大母賢之謂新婦不獨能其家卽國
祚賴之矣是時王邸第未治又爲先王治寢園羊山
工鉅而訾不贍王以爲憂妃請爲王計歲入王祿可
千餘金而奉邑所上厨校又千餘金皆君賜也第
無闌費移以治第治園庶幾不病民且彰君賜不
亦可乎若邸中一切經用請得躬執勤儉無使一人
有浮食而以餘粟餘布佐之蓋三四年兩鉅工告成
國人賀王而王歸功妃妃曾無德色也已念王早孤
家廟禮多創而未備請下王臣之知禮者議議如禮

遂著爲令而世守之妃既有子鎮國彌鉞與宣懿年
相次而才過之妃每抑鎮國不使與宣懿抗會宣懿
病不任應對起拜王將以偏繫衣之妃從中力贊竟
以宣懿請封王後宮多姬姬且多舉子有王姬者美
而有寵於王陰行妒將不利於諸姬子妃輒傾身陰
翼之皆得免王姬恚恨因時時語侵妃妃恐傷王意
不與之校無何王寢疾妃呼天請代不可竟薨妃哭
之累絕誓以死殉唐憲王匍匐往慰之乃強起宗老
或謂王姬負寵當殉王使內使曳姬姬窘求救於妃
妃憐而釋之曰若不足爲王蓐螻蟻也仁人之言哉

後宣懿王嗣位往往稱疾廢朝會禮憲王意在鎮國以爲言妃聞之持嫡廢之義力爭於王前事遂寢妃自服柱大母以下諸喪哀禮備至最後宣懿與鎮國夫婦皆不祿妃又撫宣懿之子榮僖王宇滄及鎮國之子輔國宇浹篤愛並如所生暨榮僖以冢孫嗣王稍稍倍妃而行不遜每執妃侍人而扑之事聞

唐成王將絀以宗正法妃陽驚曰無是也得無告者過乎王益心儀妃長者聞迎入宮與其妃用家人禮稱伯母進食上壽徐敕女奴數十人舉音樂前導妃宴遊別苑甚驩且授內史彤管紀述妃大節懿行將

疏聞於朝旌異之妃謝曰未亡人受知賢王幸矣
何足以塵天子覽乎蓋妃秉家政邸中歷恭簡宣
懿榮僖凡三王諸內帑外會多妃所經營而增拓者
逮其子孫若鎮國輔國出邸第令守常祿曾不以尺
帛斗粟私益之曰未亡人爲先王冢婦不得以私病
公也年七十八以病薨成王率群臣臨其喪旋祔
恭簡王墓藏焉輔國暨而能文口授其子奉國宙松
具爲狀而奉國之子碩勲孫器封相繼工辭翰而與
予神交因走使遠來屬爲那妃傳予讀太史公外戚
世家而知自古享國多外戚之助非獨三代之興爲

然也然猶以爲難言之若曰妃匹之愛君不能得之
於臣父不能得之於子乃邢妃節行純備爲能相王
業風人倫而猶保其胤嗣世世揚休美庶幾於君臣
父子之間無一遺憾塗山姜原而下誰其儔乎

中憲大夫劉公傳

劉公名賓字

世爲山西沁水人今大方伯子明

父也少業儒弗就稍稍習文法試爲邑史比見其曹
耦卑疵纖趨菱屨咋舌邑令前惟恐一有所弗當心
竊耻之曰壯夫不爲也因入貲取具冠服退而家居
者二十年不入公府一意與牛犂人力農桑織醬自

給間操餘貲買行江淮間市繒易金屬估者誤握算
多與之數十金公心知其誤也立召其人還之或嘲
公賈之趨時若猛獸驚鳥之祭惟恐失利今不藉機
智而利且倍取之何傷而乃與人若棄爲是迂也公
笑曰吾視取非其有爲不利非若所知已歸而督誨
子明治儒業且成大喜曰幸哉有子何以家爲因謁
選以文亡害補郊司權居郊未一月聞子明首舉三
晉輒囂然棄官去曰小臣不必以身用矣未幾子明
舉進士奉 詔入史館日簪筆侍 朝無間請急歸
省公而獨南嚮念公不置踰歲乃得遣使迎公如京

邸子明喜動顏色爲奉几杖進不上食公愀然不樂
曰享取其適而重綵簪豆非老人適也小子聽之時
與子明同館者二十八人聞公至皆結駟具羔鴈儼
然造之見公恂恂長者又美髯豐頰多福壽徵莫不
舉手爲子明賀迨公還沁又相率有贈言都人士榮
之而公獨逡巡不敢當會子明由諫官外調公無愠
色曰兒弟直道事人內外奚擇焉後稍遷民部員外
公是以有承德郎之封未幾歷浙江按察副使公是
以又有中憲大夫之封璽書自天鐵豸金緋焜耀
閭里蓋殊遇也客以賀公公無德色曰以小臣被

再命不知兒所爲報矣因時時移書誠子明其益精
白乃心乘時樹勛伐用荅主上寵靈萬分一母以
老人爲念以故子明敷歷中外二十餘年所至名實
純美赫赫稱王佐才盖得之義方者厚也子之能仕
父教之忠公其有焉公旣貴而有家一無所改其初
節居恒忍嗜欲薄飲食與布衣士同風出入一款段
馬兩蒼頭從之邑令強之輿弗輿歲計所入董董克
食指共賓祭稍餘數十金卽以市粟饒之外庾以待
里人之貧者月歛則平賈糶之歲歛則計口賜之從
子東啓少派公子而教之遂成邑名士東鄰子困急

以其所居室售公公與之直矣而又閔然念其父老不忍使遷遷俟數歲其父以天年終乃爲其子購別室居之公之爲長者類是豈一有所絲歸乎吳子曰茲所爲積善也夫積非有爲而爲且非一朝一夕之故也公累行自少至老不衰若所稱史不屑抱牘賈不屑殖利仕能行其意以自免老有封爵而能自貶損以行仁義此何所爲而爲之公叔子之言曰順鍼纓者成帷幕合升斗者成倉廩并小流者成江海劉之餘慶未艾其自公身卜之矣予觀忠伯相君子其恬元甫宗伯予其壽知言哉夫恬知止足而壽以聞

根柢兩者庶幾合道而稱積而子明又足以承之
曰百世之利在樹德乎公今年七十有七體力腴健
不異壯盛時牛恭人則倍公七年矣子二長東星卽
子明方伯次東銘孫四用相用康用儉用儔並受經
衍足以世其家而予爲傳其大者如此

韓公傳

韓公下世且四年其伯子晉勲業已營葬事乞穆考
功志其幽石少保表其隧不朽矣顧其孝思未已又
以傳屬予予爲之傳曰公名廷相字良弼別號兩峰
其先潞州長子人永樂中通州公徙居長垣史友諒

屯凡六傳生公大父釗弘治初割垣之東隅爲東明縣故又爲東明人釗生公父璋娶谷孺人生公及仲廷臣季廷佐公甫十歲遭父喪而二弟尚在襁褓族子利其產將構難卯廬之公抗志不爲動久之身爲家督無暇卒業儒稍稍習法家言試爲功曹已入貲爲省祭官非其好也上承孀母下撫幼弟備歷艱苦用能復振其家叔母胡蚤寡無子公母事之卒厚葬之始終無遺憾訓育二弟並有所成立至廢著諸便利田宅惟第所欲分給之一無所私以故二弟並饒於貲輸粟縣官仲爲太學生季受省祭冠帶皆公力

也已省祭君暴卒公傷之而字其孤歐無異已出里
人稱公長者二口矣初娶楊孺人生晉勲甫八歲而
楊卒繼娶賈孺人撫晉勲未數歲而賈又卒公見晉
勲時時哭兩女過哀益憐愛之顧其望之太厚而督
誨每過嚴偶見其出而與群兒嬉也怒捕之誤撮其
頂髮髮絕血流谷孺人走抱晉勲泣讓公公雖內悔
而猶正色曰是兒豈足姑息卽使之捫痛知警亦誠
子之道也自是晉勲感悟專志力學不復爲兒戲谷
孺人老而以節終公父子執喪如禮事聞有司有司
旌其間公故與少保考功二先生爲布衣交二先生

嘗過欽公見晉勲岐嶷大奇之公乃令晉勲就學邑
中師事二先生二先生爲櫟括之經術日益精進未
幾補邑博士弟子隆慶庚午舉於鄉鄉書至公走謝
二先生二先生又曰晉勲千里駒此特其初駕耳請
更待之越萬曆丙戌晉勲舉進士公大喜益歎二先
生知人隨策一蹇視晉勲於邸未數日從間道歸不
使人知暨晉勲除德安司理迎養公公見晉勲日坐
訟堂召罪人對簿判秉辟決死生公惻然誠之曰見
爲刑官關民命至重古有斷獄流涕務從輕比者蓋
其慎也兒盍加慎焉厚汝德冒汝來裔晉勲故豈第

士聞公言益謹出而求情入而報命行之三月郡獄
平公喜曰兄庶幾有仁風哉吾將歸而爲汝萬里門
矣比歸屬吏有以文簞織葛遺公者公力謝不受曰
田舍翁無所用此遂垂橐入里中里人高之謂公能
以無欲助于廉也公居恒善治生理家不辭纖畜後
家起子且貴公愈折節下人不設城府人益樂親之
里有兄弟相構累歲不決者聞公孝友輒退而自慙
惟恐公見公性又好施徃徃急人之困而不自德歲
饑出粟貸其鄉鄰所全活甚衆見道殣則繫裡而掩
之公生平質行類此人猶異其享大產膺重封爲快

也乃歸自德安年纔五十有六遂病卒天道謂何墓
在宅之某方兩孺人衿子卽晉勲名魏初晉勲奔喪
哀號累絕已除服起家補武昌司理其理武昌猶奉
公遺誠獄無大小稱平至其自愛儼然一介不取則
神明可質茲真歸公于歲吳某曰嗟乎韓公善樹德
乃爾其有子如晉勲殆天祚之而食報不必以旦夕
計昔于公以不克興其後楊伯起以清白遺其子孫
司理君無有焉而公實貽之矣餘詳考功志不具述

張毋龍孺人傳

孺人蚤世且九年其孤如岳始介友人賴茂永來乞

予作傳茂永又具述其家世貴盛與孺人節行甚都
予卽有作庶幾無浮譽乎傳曰孺人姓龍氏泰和人
後巖先生女也先生起家鄉舉仕爲行唐令其二子
並以文學補官晚舉孺人先生愛其娟秀鞠之甚珍
因命名曰九玉暨孺人脫襁褓日開內訓端容止精
習諸女紅蚤夜不懈先生亟摩其頂曰此吾家文夫
女第難爲倩耳已擇倩得張司城子煥大喜以爲嘉
耦蓋張故萬安右族司城君又倜儻好讀書無得當
先生而厚送孺人歸歸時年才十四髮尚不勝簪業
已能佐二尊人庀家相司城君力學內潔蒸嘗外共

賓客曾不俟告成立辦焉後司城君卒業太學授某
城兵馬司兵馬稱京朝官然其性任俠好與四方賢
豪結歡不屑視生產孺人拮据操作力贊之卽浮費
日繁而故費不少損亦不少拂司城君意司城君曰
子真丈夫大哉越隆慶癸酉司城君捐館舍是時如
岳甫薨二尊人耄矣孺人乳粥然忍死骨立抱孤事
二尊人憐極孝謹自矢終身無異志有窺其尚少而
微諷之者孺人輒唾其面拒之曰尔猶人貌乃欲禽
獸我乎自是宗黨內外無不視孺人冰玉者未幾二
尊人相繼病且卒孺人視藥視含以及襄大事一秉

於禮觀者益賢之會有睥睨其家將造嚴以嘗孺人者孺人正色厲聲斥之曰三靈在天六尺之孤在戶未亡人可死而不可暴若將奚爲於是睥睨者死舌寢謀而孺人有家如故然孺人雖有家而性好儉素衣不厭澣食不厭䟽卽漚麻漂絮一切纖嗇細務類多身親爲之至於篤宗親振鄰里貧乏則又一無所靳其視如岳孤雖厯厯如一綫而歲時督誨每過於嚴未嘗以姑息爲愛卽誦習之暇一有嬉游輒召而夏楚之且泣且誠曰兒忘人欲奪汝毋將危汝身而利汝家乎是何可一日不自振也卽不自振而家聲

有所失墜未亡人異日何以見三靈地下乎暨如岳
受室經術且垂成孺人猶督誨之如初以故如岳益
抗志於學而懷經世遠圖未敢一日違母輕出求自
試無何孺人病不起其在彌留時神氣猶爽然瞻視
不亂第抱如岳臂泣叙祖父締造之艱與孺居嗣守
之苦屬如岳勉承之目遂瞑時萬曆甲申五月某日
如岳哀毀終喪始得試僑補邑學諸生尋應明經舉
待用有地固孺人督誨力也嗟乎孺人以弱齡爲張
家婦二十七而孀居三十八而化去計其事司城君
之日少而爲張氏積功遺慶獨多大者矢心從一不

踐二庭且身代司城君厚送其親而義方其子節孝
何廩廩也而又能肅內政彌外侮保有故家以遺其
後卽享年無幾而令名常在宇宙其貞姜嚴姬之傳
乎是何可使泯泯無傳也

記二首

煙光樓記

欽之侯公初以按察僉事提兵駐紇坐扼三楚東戶
所爲保障計甚備不具述公每出江上視水師有暇
輒就行營甌脫間延禮二三鄉大夫談名理詰故實
坐必移晷而後休已公謂甌脫庠庠非所以居長著

將謀構一講堂易之會聞湖北之命行不果後二年公自湖北移鎮襄陽且三年遭太夫人喪扶櫬東下舟過蘄則蘄父老遮道泣送公公亦泫然泣下蓋卽公故所視師處也公徐起步過行營愴然興嗟顧謂二三大夫不佞不習爲吏三仕楚矣乃所至楚人不求多而反見德豈非諸大夫躬厚道風之雖然不佞豈能一日忘楚且負諸大夫也請得用予初志構講堂於斯紀一時之遇以期再晤可復許乎二三大夫曰善於時梁生之文以地一區獻姬生賓明願肩後公喜出橐中金若干授姬生以去時萬曆癸未

冬日越明年甲申夏四月姚生與梁生之大父佳然
相與經營之偕得鉅材遂鳩工創爲樓三楹是秋七
月樓成二三大夫登焉則地勢爽塏結構宏麗且負
郭抱山襟江帶湖憑闕四望西際樊口東薄匡廬水
氣氤氲巖霏縹緲數百里奇勝攬在眉睫二三大夫
栩栩然歎曰樓壯哉微公其誰當之客有謂吾屬因
公建樓登樓思公蓋名侯公樓乎夫楚之爲樓其最
顯者武昌庾公巴丘燕公營道萊公襄陽仲宣皆志
其人與樓俱永其義亦猶是也姚生曰美矣非公意
也夫公蓋欲與諸大夫共也者且與諸父老共也者

公不自有其德而寧有其樓乎今公雖去楚乃楚人
席公餘芘居按堵而卧帖席日所睹見數百里煙光
出沒山水間皆幻也而吾屬與公時聚時散亦幻也
夫宇宙之內惟幻乃真惟真乃無盡而世之所指以
爲真者又未必非妄也妄必有盡時矣茲欲以無盡
思公其煙光乎維時日已薄莫客有誦王子安所著
煙光凝而暮山紫者二三大夫躍然喜曰善遂名煙
光樓且以廣公意云姚生因具狀涉江來請予記予
知姚生嘗受學於先生多聞而好行義遂爲之記若
此

遊白雀洞記

洞在富口東大嶺之絕巔故無名頃歲有彈雀者過其處見白雀彈之遁入石罅間不可得因拔荆莽求焉則涇涇一洞也遂亦不敢深入出以語富口人富口人始有一二好事者從之遊呼爲白雀洞云友人莊則勸時時謂予曰其奇予雖病憊乃有景在域中勃勃神往矣會率舟送所知出江泊百箭港則勸迎謂予曰白雀洞微子不名茲來豈山靈意乎其明口則勸偕其弟則可則大與其門人程子良瞿伯明各以壺榼趣予予乃自港登陸窮富口水郭越玄帝廟

遵江干東行見江帆與予巾車爭馳野興益適可三
里度軍山之陰經吳將甘寧墓又二里許境漸僻徑
漸崛崎旋躋一曲磴諸客稱疲頽息焉且息且飲
移時而後起凡數折得小嶺跨其脊以望大嶺尚百
仞餘皆童山第多美石盤紆礧砢秀色參天意所謂
洞當在石際也從脩隴陂陲而上二里許得洞門業
已有樵人束火爲前導門以內左徑右潭徑久幾不
容屨俯身而下得平土可受十五六人潭故與江爲
消長杳眇莫知其深乃其旁石磷磷起周遭連蟠狀
若欄楯蓋天造也已從來火又入一竅如此房雖稍

湫隘而四壁皆文石玉質星彩爛然挾火光射入顧
見壁間綴巢石乳淋漓其中叩之樵人曰白蝙蝠巢
也嘗考蝙蝠食石乳千年毛羽盡白信矣信矣鄉彈
雀者所見白雀得無卽蝙蝠乎彼千年靈異物豈彈
射所得加也徒爲吾黨除道耳已就外洞取隙光與
諸客席地飲十數行扶携而出登洞前危峰振衣四
顧長江外繞重湖內滙風濶雪浪浸滌兩腋而盤塘
富口萬井相望厓厓如積蘇回睇大坡石樓鍾成冊
竈隱約烟霏中不可辨而獨吳伍負故壘唐李煜殘
堞魏鍾繇洗墨池與下雉南城諸遺墟並接襟袵可

指而弔焉乃若西招樊山東揖廬阜上下數百里烟
光吞吐紛紛排排使人應接不暇茲太嶺之擅奇也
豈盡於一洞哉於是諸客乘興各踞一石鼓飲痛醉
吾兒無忌挾其友陳生後至則携來酒汁且盡矣少
選反照在山千巖競麗予且頽唐而歸比至山麓遇
友人莊則久携酒勞予旧家頗不勝杯酌乃後至兩
生則一啖而罄其餅矣時萬曆丙戌十月晦日

丹山別業記

海陽邑南三十里有丹山登臨谿上福源水出焉谿上故多素封世家而程爲最鉅程季子汝正又予少時布衣交頃築園舍旁頗擅丹山之勝何侍御少愚名之曰丹山別業季子常約予爲別業游不果因請予記予謂生平酷嗜佳山水然不能踰度而意繪之姑有待焉越五年書米大有舛望始據狀爲之記曰別業蓋跨源水而扉循石梁入扉數武則割源爲池池瀟瀟受烟月又飛一橋水面若虹飲橋脊負一亭曰濠上亭意其處可任公子釣也舍橋而北爲覽輝

堂堂植雙桂抗檐起勢欲參天堂左右爲招隱儲芳
二齋沿砌雜植名卉與池藻相輝映從右徑入羣玉
山山蓋壘太湖英山諸異石成矗立方池中巋然瞿
塘灩澦雖象馬不足名耳山半得清泠亭有泉鄰鄰
落方池作鳴玉聲稍折而下入藏陽洞洞不甚邃而
石脂吐四壁英英可餐尋從一竅蛇行出洞又得漁
磯一躡磯而上則平臺由平臺稍却則倚雲亭亭臺
之間巖壑窅窳篠竹樹葱菁無復人間境矣亭背闢一
關曰壺闢逕如在堂堂奉玄帝居也其左徑則栝栢
數十章交陰僻巷蔽虧日月雖盛夏不暑窮巷而小

嶺出嶺多紅梅每歲梅先春而華因名絳雪嶺嶺半
長松偃蓋下覆白石几以待手譚凡再折入雲岫窺
水簾洞飛泉散沫聯如貫珠響如曳珮令人心目倍
清洞前巨石怒起筋骨盡露作猛士當關狀由洞後
捫壁側足而登出藂蘿外則又平行可縱步因繚以
石垣而建八風榭其上倚榭騁目則黃山白岳諸峯
隱隱睂睫矣邑令南海陳君爲榜其榭曰丹山積翠
蓋茲山最高處由北巷而南穿一竇得齒蒲軒軒半
架池上池蓮可千頭花時亡異坐錦雲中不觴而醉
又垣外多垂柳清陰入軒返照鳴蟬佐之令人忘倦

其兄辰州君汝揚常飲而樂此因題曰新皎清芳又折而左依槿籬行籬以內皆蔬畦籬盡歷木香棚籬薇架南涉湘筠坡坡下積潦成陂而芡苳菱芡雜茂其中而陂之東涯桐陰匝地忽五石如飛來借名五老峯峯下時譜品菊而閣其上曰翫宜閣迤邐而南上華陽岡入翠里皆披榛莽行而朱實累累高樹間能解人道暘最後陟舒籟臺臺執屐出樹杪俯視風榭又隕然矣下臺經白茆亭東入薜蘿庵庵中頂禮觀音大士而以薜蘿花爲清供北望如在堂金碧相對茲別業之大槩云季子每謂是役非敢自爲樂初

以奉家大人歡而與四方賓客共且微玄帝大士之
靈毋令人以我爲泰也吳子曰予據狀爲記託之乎
計游曾不能僂數其勝卽異日躡屨從季子游奈應
接不暇何夫季子方挾高貲賈行吳楚間家殷殷起
乃其志不在什一之利而在山水之大觀此必有闕
闕乎塵埃外者予按丹山郡志所不載而水經所載
丹穴之山又在異域非是或曰以山多赭石名或曰
容成子浮丘公嘗於天都合丹豈季子亦欲有所託
而游於無何有哉

既甄洞續稿

卷之十

十四

既甄洞續稿文部卷之十終